

# Tuhun Nyoo Cha Tyaa San Marcos

---

Nu sacondutyá ra Juan chi ñáyivi ta cahán ra tuhun Nyoo chihin ñu  
(Mt. 3.1-12; Lc. 3.1-9, 15-17; Jn. 1.19-28)

**1** Tyehe caa quichaha tuhun vaha ra Jesuscristo Sehe Nyoo.

<sup>2</sup>Ra Isaías profeta Nyoo tyaa ra tuhun ra Cristo ta tuhun ra Juan. Tyehe caa catyí Nyoo chi ra Cristo:

Cumañi ca cuhun siqui ñuhu ñayivi ta cutachi chi noo ra cusacoto chi ñáyivi vatyi nyaá cuhun nu nyicú ñu, catyí Nyoo chi ra Cristo.

<sup>3</sup>Chiñí yo ndusu noo ra cha canachaá nu chiqui ndii, ta catyí ra: “Tari sanduvahá ndo noo ityi, tyicuan caa sanduvaha ndo aña ndo vatyi cua quichi Sutu Mañi yo.

Nuña ndo noo ityi ndoo chi ra na quihvi ra aña ndo.”

Tyicuan caa tyaa ra profeta Isaías nu tutu Nyoo ta cha naha.

<sup>4</sup>Ta tyicuan caa quichi ra Juan sacondutyá ra chi ñáyivi nu chiqui ndii cuan. Ta catyí ra chi ñu na ndu uvi iñi ñu cuatyí ñu, ta na condutyá ñu tari noo seña tyi nasama ñu cuhva iyó ñu, ta tyicuan caa ta Nyoo cusaha ra ticahnu iñi cuatyí

ñu. <sup>5</sup>Ta tandihi ñáyivi ityi Judea quichi coyo ñu tyasoho ñu tuhun cahán ra, ta ñu ñuu Jerusalén ñandihí. Ta cha yaha nahma ñu cuatyí ñu, sacondutyá ra Juan chi ñu yuvi cahnu Jordán.

<sup>6</sup>Ta sahma cha ñihno ra Juan cuan chihin ixi camellu chino chi. Ta ñii cuví sinchu ra. Ta pinchi tuhvá ra chachí. Ta tyañuñu cuhu tuhvá ra chihí. <sup>7</sup>Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee iñi chi ican saha yuhu. Ta ña nañé ni cha ndachi ñii xityin ndichan ra. <sup>8</sup>Yuhu sacondutyé chi ndo chihin ndutyá. Soco maa ra cusacondutyá ra chi ndo chihin Tatyí Ii Nyoo —catyí ra Juan.

## Nu condutyá ra Jesús

(Mt. 3.13-17; Lc. 3.21-22)

<sup>9</sup>Quivi cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnu Jordán. Ta yucuan sacondutyá ra Juan chi ra. <sup>10</sup>Ta cha yaha condutyá ra Jesús, ta cuhva cha cua quita ra chichi ndutyá, ta nanyehé ra andivi cuahan nuña. Ta nyehé ra Tatyí Ii Nyoo tari noo paloma, vachi noó siqui ra. <sup>11</sup>Ta

tyacú noo ndusu ityi andívi ta catyí ndusu cuan tyehe caa:

—Yoho cuvún Sehi ta cuñí xain chuun. Ta sii xaan cuñí chuhun — catyí ndusu cuan.

**Nu nducú nyehe ra ña vaha chi ra Jesús**

(Mt. 4.1-11; Lc. 4.1-13)

<sup>12</sup>Yahá cuan ta sacuhun Tatyí Ii Nyoo chi ra Jesús noo nu chiqui ndii. <sup>13</sup>Ta yucuan chinyaá ra uvi xico quívi nu chiqui ndii cuan, nu yori ñáyivi iyó, maa ri quití iyó. Ta nducú nyehe cuihna chi ra. Ta yahá cuan ta chaá coyo ángel ta catyiñuhú ra chi ra.

**Nu quichahá saha tyiño ra Jesús ityi Galilea**

(Mt. 4.12-17; Lc. 4.14-15)

<sup>14</sup>Cha yahá catyihí ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyivi. <sup>15</sup>Ta catyí ra: —Cha chaá cuhva cha cua cunyaca ñaha Nyoo ánima ndo. Yatyin ri nyaá ra chihin ndo. Ndu uvi iñi ndo cuatyí ndo, ta chino iñi ndo tuhun Nyoo cha sacacu ánima ndo —catyí ra Jesús.

**Nu caná ra Jesús chi cumi tahan ra catiín tiyaca**

(Mt. 4.18-22; Lc. 5.1-11)

<sup>16</sup>Chicá noo ra Jesús yuhu miñi cha nañí Tyañuhu Galilea. Ta nanyehe ra chi ra Simón ta chi yañi ra, ra Andrés, cacañí ra yuhva ra nu ndutya, vatyí ra catiín tiyaca cacuví ra. <sup>17</sup>Ta catyí ra Jesús chi ra:

—Cunyon ndo chii, ta yuhu cusacuví vatyí tari ñihí ndo tiyaca,

tyicuan caa cuñihi ndo ánima ñáyivi, tava ndo chi ñu nu quiñi caa, na quihvi ñu cuenda Nyoo — catyí ra Jesús chi ra Simón ta chi ra Andrés cuan.

<sup>18</sup>Caa cuhva ri cuan casandoo ra yuhva ra, ta cuahan coyo ra chihin ra.

<sup>19</sup>Yahá cuan ta chiin ri ca chica ra Jesús, ta nanyehe ra chi ra Jacobo, sehe ra Zebedeo, ta chi yañi ra, ra Juan. Cañohó ra chichi noo canoa canaquicú ra yuhva ra. <sup>20</sup>Caná ra Jesús chi ra. Ta ninduvi tahan ra casandoo ra sutu ra, ra Zebedeo, chichi canoa chihin ra catyinyeé chi ra. Ta cuahan coyo ra chihin ra Jesús.

**Nu nduvahá noo ra yihí tatyí ña vaha ánima**

(Lc. 4.31-37)

<sup>21</sup>Ta chaá coyo ra ñuu Capernaum. Ta cuví chi noo quívi nyitatú ñáyivi, ta quihvi ra Jesús chichi vehe ñuhu, ta quichahá sañaha ra tuhun Nyoo chi ñáyivi. <sup>22</sup>Ta iyo cuñí ñu tuhun cahán ra, vatyí sañahá ra tari noo ra iyó vaha ityi chii cha cahán. Ña cahán ra cuhva cahán ra casacuahá cuenda ley vehe ñuhu. <sup>23</sup>Chichi vehe ñuhu cuan ñohó noo ra yihí tatyí ña vaha ánima. Ta caná chaa ra ta catyí ra:

<sup>24</sup>—¿Náá tuhun cha tyihún chuun chihin ndi, yoho Jesús ra ñuu Nazaret? ¿Atu vachun vatyí sanaun chi ndi? Yuhu ñohó nui chuun, ta chité vatyí Sehe Ii Nyoo cuví chuun —catyí ra yihí tatyí ña vaha cuan chi ra Jesús.

<sup>25</sup>Nacahan ra Jesús ta catyí ra chi tatyí ña vaha cuan:

—iTaxi ri! iSaña chi ra ndahvi chiña! —catyí ra.

<sup>26</sup>Ta tatyí ña vaha cuan, chihí tañi ra cuhví cuan saha chi, ta iyo canachaḥ tatyí cuan quita chi ra. <sup>27</sup>Tandíhi ñáyivi yuhvi xaan ñu cuví, ta candaca tuhun ñu chi tahan ñu, ta catyí ñu:

—¿Ñáá cha cuví ihya? ¿Ñana vaha tuhun chaa sañahá ra ihya? iVatyí iyo vaha tunyee iñi chi ra, nyacua nya tatyí ña vaha, ta quichahá chi ra! —catyí ñu.

<sup>28</sup>Ta numi ri cachito ñáyivi tandíhi ñuu cha iyó Galilea cuan tuhun ra Jesús.

**Nu sanduvahá ra Jesús chi maha tyiso ra Simón Pedro**

(Mt. 8.14-15; Lc. 4.38-39)

<sup>29</sup>Cuhva cha quita coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra.

<sup>30</sup>Ta maha tyiso ra Simón catuví ña nu chito, cuhví ña chihin cahñi. Ta catyí ñu chi ra Jesús tyi cuhví ña.

<sup>31</sup>Tyicuan ta tuhva ra Jesús, ta tiñ ra ndaha ña. Ta nacoñehē ra chi ña. Ta caa cuhva ri cuan, tinyaḥ cahñi chi ña. Ta quichaha tyiñuhu ña chi ra.

**Nu sanduvahá ra Jesús chi cuaha ñu cuhví**

(Mt. 8.16-17; Lc. 4.40-41)

<sup>32</sup>Cuhva cha quee ñanyii ta cha cua cuaa, quichí nyaca ñu tandíhi ñu cuhví ta ñu yihí tatyí ña vaha nu nyaá ra Jesús. <sup>33</sup>Ta tandíhi ñáyivi ñuu cuan candu iñ ri ñu yuvehe cuan. <sup>34</sup>Ta cuaha ñu cuhví cha siñ siñ cuehe sanduvahá ra.

Ta tavá ñehe ra chi cuaha tatyí ña vaha, soco ña chaha ra cha cahan tatyí cuan, vatyí chitó cuan yóo ra cuví ra.

**Nu cahán ra Jesús tuhun Nyoo ityi Galilea**

(Lc. 4.42-44)

<sup>35</sup>Ta cha inga quivi cuhva cha ni ñaa ca, ndicuita ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chi Nyoo. <sup>36</sup>Ta ra Simón ta ra tahan ra cuahan coyo ra cua nanducu ra chi ra. <sup>37</sup>Ta cuhva cha canañihí ra chi ra cacatyí ra chi ra: —Tandíhi ñáyivi nanducú ñu chuun —cacatyí ra chi ra Jesús.

<sup>38</sup>Soco maa ra catyí ra chi ra: —Coho ndo inga ñuu cha nyicú yatyin ri ihya, vatyí cahan tiqui tuhun Nyoo yucuan, vatyí yucuan tyiño vachi —catyí ra Jesús chi ra.

<sup>39</sup>Yucuan chaha chica noo ra Jesús tandíhi ri ñuu cha iyó Galilea, cahán ra tuhun Nyoo chichi vehe ñuhu tahan tahan ñuu. Ta tavá ñehe ra tatyí ña vaha cha yihí ña ñáyivi.

**Nu sanduvahá ra Jesús chi noo ra cha tyahyu coño**

(Mt. 8.1-4; Lc. 5.12-16)

<sup>40</sup>Noo chaha tuhva noo ra cuhví cha tyahyu coño nu nyaá ra Jesús. Ta chicuñi chiti ra nuu ra, ta catyí ra chi ra:

—Tatu cuñún, cuví sanduvahun chii —catyí ra.

<sup>41</sup>Ta cundahvi cuñí ra Jesús nyehé ra chi ra, ta tyiso ra ndaha ra síqui ra, ta catyí ra:

—Cuñí sanduvahi chuun. Ta na nduvahun vityin ri —catyí ra chi ra.

<sup>42</sup>Caa cuhva ri cha catyí ra tyehe caa, tinyaa cuehe cuan chi ra, ta nduvahā ra. <sup>43</sup>Tyicuan ta catyí ra Jesús vatyí cha cuvi cuhun ra, soco catyí xaan ra chi ra na sacuvi ra tyehe caa:

<sup>44</sup>—Nyehe. Yori chihin cahun tuhun. Soco cuāhan nu nyaá tata sutu. Ta sañahun chuun chi ra, ta cuhvon cha tahán chi cuhvon na ndundiun nu Nyoo tari cuhva catyí nu ley cha tyaā ra Moisés, vatyí tacuhva coto tandíhi ñáyivi tyi cha nduvahun chihin cuehe cuan — catyí ra Jesús chi ra.

<sup>45</sup>Soco ra cuan chahan ra, ta quichahā nacatyí ra chi tandíhi ñáyivi. Yucuan chaha ña cuvi ca quihvi ndichin ra Jesús chichi ni noo ñuu. Ta ityi chata ri ñuu chicá noo ra nu yori ñáyivi iyó, soco tandíhi ri ityi quitā coyo ñu, quichí nyehe ñu chi ra.

**Nu sanduvahā ra Jesús chi noo ra cuhvi cha ña cuvi nacanda**

(Mt. 9.1-8; Lc. 5.17-26)

**2** Suhva quivi yahā ta quihvi ra Jesús inga chaha chichi ñuu Capernaum. Ta cachito ñáyivi tyi nyaá ra vehe. <sup>2</sup>Ta numi ri candu ñin ri cuaha ñáyivi. Ta nyacua ña chitahan ñu, ni yuvehe. Ta maa ra Jesús cahan ra tuhun Nyoo chihin ñu. <sup>3</sup>Tyicuan ta cumi tahan ra canyisó chi noo ra cuhvi cha ña cuvi nacanda, caquichí nyaca ra chi ra nu nyaá ra Jesús. <sup>4</sup>Soco ña cuvi caquihvi ra nya nu nyaá ra Jesús cha cuenda vatyí tuvi xaan ñáyivi. Tyicuan ta candaā ra ityi xiñi vehe. Ta sacuachiyō ra suhva tyiyo. Ta sanoō ra chi ra cuhvi cuan

chihin chito. <sup>5</sup>Nyehe ra Jesús vatyí cacinó xaan ñi ra cuan. Ta catyí ra chi ra cuhvi cuan:

—Cha ndachí cuatyun, suti — catyí ra Jesús chi ra.

<sup>6</sup>Soco suhva ra sacuahá cuenda ley vehe ñuhu nyicú ra cuan, ta cachicá xiñi ra tyehe caa: <sup>7</sup>“¿Ñáá tuhun cha cañá ñi ra ihya cahan ra tyehe caa? Chicoō cuatyí ra nuu Nyoo chihin tuhun cahan ra vatyí yori cuvi sandachi cuatyí, noo tuhun ri maa Nyoo cuvi sandachi ra cuatyí”, cachicá xiñi ra. <sup>8</sup>Soco ra Jesús chitō ra cha cachicá xiñi ra. Ta catyí ra chi ra:

—¿Ñáá tuhun cha chicá xiñi nyoho tyicuan caa? <sup>9</sup>¿Ñáá cha yii ca, cha catyí yo chi ra cuhvi ihya vatyí cuatyí ra cha yahā ndachi, o cha catyí yo chi ra vatyí nducuita ra ta naquehen ra chito ra ta caca ra? <sup>10</sup>Vaha, vityin chihin cha sanduvahi chi ra ihya, cusañahi chi ndo vatyí yuhu ra cuvi Rayii cha quichí nya gloria, iyó ityi chii cha sandachi cuatyí ñáyivi —catyí ra Jesús chi ra.

Tyicuan ta quichaha catyí ra chi ra cuhvi cuan:

<sup>11</sup>—Catyí chi yoho, ndicuita, naquehen chiton, ta cuānuhu nya vehun —catyí ra Jesús chi ra.

<sup>12</sup>Ta ra cuhvi cuan ndicuitā ra. Naquehen ra chito ra, ta cuānuhu ra. Ta tandíhi ñu nyehe ñu, ta iyo cuñí ñu, ta sacahnú ñu chi Nyoo, ta catyí ñu: —Ni noo chaha ta nyehe ca yo cha tyehe caa —catyí ñu.

**Nu canā ra Jesús chi ra Leví**

(Mt. 9.9-13; Lc. 5.27-32)

<sup>13</sup>Yahā cuan ta cuahan tucu ra Jesús inga chaha yuhu miñi cuan.

Ta cuhva cha natacā ñáyivi nu nyaá ra, quichaha cahan ra nuu ñu. <sup>14</sup>Tyicuan ta cuahan ra ta nu yahā ra nanyehe ra chi ra Leví sehe ra Alfeo, nyaá ra nu sahá tyiño ra, tavá ra xuhun cuenda gobiernu ñuu Roma. Ta catyí ra Jesús chi ra:

—Coho chihin.

Tyicuan ta nducuitā ra Leví, ta cuahan ra chihin ra.

<sup>15</sup>Yahā cuan ta tahan chi nyaá ra Jesús chihin ra cachicá noo chihin ra cachachí ra nu mesa vehe ra Leví. Ta nyicú tucu cuaha ra catavá xuhun chihin inga ñáyivi iyó cuatyí. Vatyí cuaha xaan ñu nyicón chi ra. <sup>16</sup>Soco ra casacuahá cuenda ley vehe ñuhu, ta ra cacuví fariseo, ra cha quichahá xaan ley vehe ñuhu, cha canyehe ra vatyí chachí ra Jesús chihin ra catavá xuhun, ta ñu iyó cuatyí, ta cacatyí ra chi ra cachicá noo chihin ra Jesús:

—¿Yoso caa cha ra sacuaha chi nyoho chachí ra ta chihí ra chihin ra catavá xuhun ta ñu iyó cuatyí?

<sup>17</sup>Chiñi ra Jesús cha cacahan ra ta catyí ra:

—Ña chiñuhú doctor chi ñu ña cuhví, soco chiñuhú ra chi ñu cuhví. Vachi yuhu soco ñima cha cuenda cha vaha chi ñu vaha, soco cha cuenda cha vaha chi ñu iyó cuatyí —catyí ra Jesús chi ra.

**Nu sañahá ra Jesús vatyí nya cha yaha canyaha ra chi ñu nyicón chi ra, tyicuan ta cutahan chi savaha ñu ayuno**

(Mt. 9.14-15; Lc. 5.33-35)

<sup>18</sup>Noo chaha, ra canyicón chi ra Juan ta ra canyicón chi ra fariseo, ña chachí ra ta nanducú ra chi

Nyoo. Ta suhva ñáyivi quichí coyo ñu nu nyaá ra Jesús, ta ndacā tuhun ñu chi ra, ta catyí ñu chi ra:

—¿Ñáá tuhun cha ra canyicón chi ra Juan ta ra canyicón chi ra fariseo tuhvá ra savaha ra ayuno, ta ra cachicá noo chuhun ña tuhvá ra? —catyí ñu.

<sup>19</sup>Ta nacahan ra Jesús ta catyí ra:

—Noo vico tandaha, ¿atu cuví cha ma cachi ra ñohó vico cha ni ri ca cha nyaá ra cha cua tandaha cuan chihin ra? Tatu nyaá ca ra cua tandaha cuan chihin ra, ma cuví cha ma cachi ra. <sup>20</sup>Soco vachi chi quivi cha cutinyaa ra chi ra tandaha cuan nu nyicú ra tahan ra. Yucuan ndicha quivi coo cuhva cha ma cachi ra ta nanducu ra chi Nyoo —catyí ra Jesús chi ñu.

**Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra**

(Mt. 9.16-17; Lc. 5.36-39)

<sup>21</sup>Catyí ra Jesús:

—Yori naquicu noo sahma chahnu chihin noo sahma chaa, vatyí cha chaa cuan nandiyi ta cahnya chi sahma chahnu, ta nu tahnya cuan cunducahnu ca. <sup>22</sup>Ta ni ri ña tuhvá yo tyihi yo vinu chaa chichi ñii chahnu, vatyí vinu chaa chahnyá chi ñii, ta chati vinu, ta tiví ñii. Yucuan chaha cuñí chi cha tyihi yo vinu chaa chichi ñii chaa —catyí ra Jesús.

**Nu catohon ra cachicá noo chihin ra Jesús yoco trigu quivi nyitatu ñáyivi**

(Mt. 12.1-8; Lc. 6.1-5)

<sup>23</sup>Noo quivi cha tuhvá ñáyivi nyitatu, cuahan ra Jesús chicá ra

mahñu nu iyó cha tachí ñáyivi. Ta ra cachicá noo chihin ra quichaha catohon ra yoco trigo cuan cuhva cha yahá coyo ra. <sup>24</sup>Tyicuan ta quichaha cacatyí ra fariseo chi ra Jesús:

—iNyehe xihna! ¿Ñáá tuhun cha sacuví ra cachicá noo chuhun tyiño cha ña tahán chi sacuví yo quívi nyitátú yo? —cacatyí ra.

<sup>25</sup>Soco maa ra Jesús catyí ra chi ra:

—¿Atu ni noo chaha ta sacuha cha nyoho cha sacuví ra David chihin ra tahan ra noo quívi cha cachisoco vavaha ra? <sup>26</sup>Quívi cha cuví ra Abiatar tyiño cha cuví ra nuu chi tata sutu, quihví ra David chichi vehe Nyoo. Ta chachí ra pan ii, cha tahán chi cachi maa ri maa ra cuví sutu. Ta chaha tucu ra cachi ra ndihí chihin ra —catyí ra Jesús.

<sup>27</sup>Ta catyí tucu ra Jesús chi ra:

—Chicoo quívi nyitátú yo, cuenda cha vaha chi ñáyivi, soco ñáyivi ña chicoo ñu cha cuenda cha vaha chi quívi nyitatu yo. <sup>28</sup>Yucuan chaha yuhu Rayíi cha quichí nya gloria, iyó ityi chíi cha catyí chi noo noo ndo ñáá cha sacuvi ndo quívi nyitátú yo —catyí ra Jesús.

### Nu nduvahá noo ra na ityi inchiyo ndaha

(Mt. 12.9-14; Lc. 6.6-11)

**3** Quihví ra Jesús inga chaha chichi noo vehe ñuhu. Ta yucuan nyaá noo ra na ityi inchiyo ndaha. <sup>2</sup>Ta cañañí ra fariseo chi ra Jesús nyehé ra tatu sanduvaha ra chi ra quívi nyitátú ñu, vatyí tacuhva coo cuatyí tyaa ra síqui ra. <sup>3</sup>Tyicuan ta ra Jesús catyí ra chi ra na ityi ndaha cuan:

—Ndícuita ta cuinanyaa mahñu ihya.

<sup>4</sup>Yahá cuan ta ndaca tuhun ra chi inga ñu cha tayucú cuan, ta catyí ra:

—¿Ñáá cha tahán chi sacuvi yo quívi nyitatu yo? ¿Atu sacuví yo cha vaha o cha ña vaha? ¿Atu tahán chi sanduvaha yo ñáyivi o cha cahñi yo? —catyí ra Jesús.

Tyicuan ta taxi taxi maa candoo ñu cuan. <sup>5</sup>Tyicuan ta xaan nanyehe ra Jesús chi ñu, ta cuihya cuñí ra vatyí ña cuñí ñu cutuñi iñi ñu. Ta catyí ra chi ra cuan:

—Sanacaa ndahun.

Ta sanacaa ra, ta nduvahá ndaha ra. <sup>6</sup>Tyicuan ta quitá coyo ra fariseo, ta quichaha catyíhi tahan ra tuhun chihin ra cuenda ra Herodes, yoso caa cacahñi ra chi ra Jesús.

### Nu nyicú cuaha ñáyivi yuhu miñi

<sup>7</sup>Soco ra Jesús cuahan ra chihin ra cachicá noo chihin ra yuhu miñi, ta cuaha ñáyivi ityi Galilea canyicón chi ra. <sup>8</sup>Ta cha chito ñáyivi tuhun nahnu cha sacuví ra, cuaha xaan ñu quichí coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyo yuvi cahnu Jordán, ta ñuu Tiro ta ñuu Sidón ñandihí, vatyí cuñí ñu nyehe ñu chi ra. <sup>9</sup>Yucuan chaha catyí ra Jesús chi ra cachicá noo chihin ra na casanduvaha ra noo canoa, tacuhva vatyí tatu ndutihin xaan chihin ñáyivi, cuví quihví ra chichi canoa cuan. <sup>10</sup>Vatyí cuaha xaan ñu cha yahá sanduvahá ra, ta yucuan chaha tandihí ñu cuhví cuahan ñu nu nyaá ra vatyí cuñí ñu tiin ñu chi

ra tacuhva nduvaha ñu. <sup>11</sup>Ta ñu yihí tatyí ña vaha añima, chicuñi chiti ri ñu nuu ra, ta canachaa tatyí ña vaha cuan, ta catyí chi tyehe caa: —iYoho cuvún Sehe Nyoo!

<sup>12</sup>Soco ra Jesús chasi ra yuhu tatyí cuan vatyí ma catyí ca chi yóo ra cuví ra.

**Nu nacachi ra Jesús chi uchi uvi apóstol vatyí cacaca ra tyiño ra**

(Mt. 10.1-4; Lc. 6.12-16)

<sup>13</sup>Yaha cuan ta ndaa ra Jesús noo yucu ta cana ra chi ra cuñí maa ra nacachi ra. Ta quichi coyo ra nu nyaá ra. <sup>14</sup>Ta tyiso ra chi uchi uvi tahan ra vatyí cundihi ra chihin ra, ta vatyí tyatyíño ra chi ra na cucahan ra tuhun Nyoo. <sup>15</sup>Ta chaha ra ityi chi ra vatyí sanduvaha ra chi ñu cuhví, ta tava ñehe ra chi tatyí ña vaha. <sup>16</sup>Ta ican ra ihya cacuví ndi uchi uvi tahan ra: ra Simón cha sacunañi ra Jesús Pedro chi; <sup>17</sup>ra Jacobo ta yañi ra ra Juan, sehe ra Zebedeo. Ta Boanerges sacunañi ra chi ninduvi tahan ra ta cuñí chi catyí: ra ñihi cahán tari cahán savi, <sup>18</sup>ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihí cuenda ityi ra cuñí cuhun cuatyí siqui gobiernu ñuu Roma cha nyacá ñaha chi ñu, <sup>19</sup>ta ra Judas Iscariote, ra cha naxico tuhun chi ra Jesús.

**Nu tyaá ñáyivi cuatyí siqui ra Jesús, ta catyí ñu vatyí tunyee iñi cuihna iyó chi ra**

(Mt. 12.22-32; Lc. 11.14-23; 12.10)

Yaha cuan ta quihvi ra Jesus noo vehe chihin ra cachicá noo

chihin ra. <sup>20</sup>Ta inga chaha nataca cuaha ñáyivi, ta nyacua ni ña cuví ca cachi ra. <sup>21</sup>Cha cachito ñáyivi chi ra Jesús vatyí nyaá ra yucuan, quichi coyo ñu vatyí cunuhun ra chihin ñu, vatyí catyí ñáyivi chi ñu tyi nduloco ra.

<sup>22</sup>Ta suhva ra casacuahá cuenda ley vehe ñuhu Jerusalén cha quichi coyo suri tyicuan caa cacatyí ra:

—Ra ihya, ra Beelzebú ra cuví nuu chi cuihna yihí chi ra. Ta chihin tunyee iñi cuihna tava ñehe ra tatyí ña vaha —cacatyí ra.

<sup>23</sup>Tyicuan ta cana ra Jesús chi ra, ta catyí ra chi ra:

—¿Yoso caa, atu tavá ñehe cuihna suri chi ra tahan maa ra? Ma sacuvi cuihna tyicuan caa. <sup>24</sup>Tatu noo gobiernu cacusiin ra, ta cacañi tahan ra chihin tahan ra, gobiernu cuan ña naha cuacunyaca ñaha ra. <sup>25</sup>O tatu ñáyivi noo vehe, ña iin ri cuví ñu chihin tahan ñu ta cañi tahan ñu, cutivi nu nyicú ñu.

<sup>26</sup>Ta tatu cuihna cacusiin ra ta canducuita ra siqui tahan ra, ¿yoso caa cucuvi chi ra? Cundihi tuhun ra.

<sup>27</sup>Yori cuví quihvi chichi vehe noo ra ñihi tari cuihna ta tinyaa ra cha chii ra, tatu ma cuhni xihna ra chi ra. Yucuan ndicha ta cuví tinyaa yo cha chii ra.

<sup>28</sup>Cha ndicha catyí chi ndo vatyí cuví coo ticahnu iñi tandihi nuu cuatyí ñáyivi, ta tandihi cha quiñi caa cha cahán ñu. <sup>29</sup>Soco ñu cahán ña vaha siqui Tatyí Ii Nyoo, ma cuvi maa coo ticahnu iñi cuenda cuan, soco tyicuan ri maa coo cuatyí ñu —catyí ra Jesús.

<sup>30</sup>Tyicuan caa catyí ra Jesús chi ra casacuahá cuenda ley vehe ñuhu,

vatyí maa ra cacatyí ra vatyí ñohó noo tatyí ña vaha chi ra.

**Yóó ñu cuví sihi ra Jesús ta yañi ra**

(Mt. 12.46-50; Lc. 8.19-21)

<sup>31</sup>Tyicuan ta chaḡ coyo sihi ra Jesús ta yañi ra, soco ndoo ñu ityi chata vehe, ta tachí ñu cucana chi ra. <sup>32</sup>Ta ra nyicú nicachico nu nyaá ra Jesús cacatyí ra chi ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyí ra chi ra.

<sup>33</sup>Soco maa ra catyí ra:

—¿Yóó ñu cuví sihi ta yañi? — catyí ra.

<sup>34</sup>Tyicuan ta nanyehé ra chi ñu nyicú nicachico, ta catyí ra:

—Ican ñu ihya cuví sihi ta yañi.

<sup>35</sup>Vatyí savahri ñu sacuví cuhva cuñi Nyoo, ican ñu cuan cuví yañi, ta cuhve, ta sihi —catyí ra Jesús.

**Tari noo ra chicá noo tachí, tyicuan caa cuví ra cahán tuhun Nyoo**

(Mt. 13.1-9; Lc. 8.4-8)

**4** Inga chaha quichaha sañaha ra Jesús yuhu miñi, ta ndu ñin ri cuaha ñáyivi nu nyaá ra. Yucuan chaha quihvı̄ ra chichi noo canoa cha tacaá nu ndutya yuhu miñi cuan. Ta chicunyaḡ ra, ta tandihi ñáyivi ndoo ñu nu ñiti. <sup>2</sup>Tyicuan ta cuaha cha sañaha ra chi ñu chihin cuhva ri. Ta nu sañahá ra chi ñu, ta catyí ra chi ñu:

<sup>3</sup>—Tyasoho ndo tuhun ihya.

Mínoo ra quitḡ ra vehe ra, cuahan ra nu iyó tyiño sahá ra. Ta quichaha quitı̄ ra chiti trigu nu ñuhú ra. <sup>4</sup>Ta ityi cuahan ra quitı̄ ra, suhva chiti cuan canacoyoḡ yuhu ityi, ta quichı̄ coyo saa ta cachachi

ti. <sup>5</sup>Suhva ca chiti canacoyoḡ ticu yuu nu ña cuaha ñuhú yihı̄. Ta chiti cuan numi ri caña, vatyí ña cono xaan yihı̄ ñuhú cuan. <sup>6</sup>Soco cuhva cha caña ñanyii, na ityi chi vatyí ña cono yihı̄ yoho chi. <sup>7</sup>Ta suhva ca chiti canacoyoḡ chichi tu iñu. Ta chahnı̄ tu iñu cuan, ta chası̄ tun nuu trigo cuan. Yucuan chaha ña chiyo chiti tun. <sup>8</sup>Soco suhva chiti cha canacoyoḡ nu ñuhú vaha. Ta caña ta chahnı̄. Ta vaha chaha tun chiti. Suhva tun chahḡ tun oco uchi chiti cha noo noo tun. Inga tun chaha tun uñi xico chiti. Ta inga tun chahḡ ciento chiti —catyí ra Jesús chi ñu.

<sup>9</sup>Ta catyí tucu ra chi ñu:

—Tatu cutuñi iñi ndo, tyasoho ndo tuhun cahın.

**Nu sacotó ra Jesús ñáá cuenda sañahá ra chihin cuhva ri chi ñáyivi**

(Mt. 13.10-17; Lc. 8.9-10)

<sup>10</sup>Yahḡ cuan ta ndooḡ maa ri maa ra Jesús chihin ñu nyicón chi ra ta ndi uchi uvi tahan ra chicá noo chihin ra. Ta candacḡ tuhun ñu chi ra ñáá cha cuñi chi catyí tuhun cuan. <sup>11</sup>Ta catyí ra chi ñu:

—Chi nyoho sacotó Nyoo tuhun xehe yoso caa nyacá ñaha ra ñanima ñáyivi. Soco chi ñu cha ña chinó iñi chi ra, maa maa ri chihin cuhva ri sañahı̄ chi ñu. <sup>12</sup>Vatyí tatu nyehé ñu soco cuvı̄ chi tari cha ña nyehé ñu, ta tatu chinı̄ ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyí ñu —catyí ra Jesús chi ñu.



**Nu chahā ra Jesús cuenda yoso caa  
cuahan tuhun ra tachí chiti cuan**

(Mt. 13.18-23; Lc. 8.11-15)

<sup>13</sup>Ta catyí tucu ra chi ñu:

—¿Atu ña cutuñí iñi nyoho tuhun ihya? Tatu tyicuan caa ña cutuñí iñi ndo, ¿yoso caa cuví cutuñí ini ndo tandíhi inga tuhun sañahí chi ndo? <sup>14</sup>Ra cha tachí chiti trigu cuan cuví ra tari noo ra cahán tuhun Nyoo. <sup>15</sup>Yihí ñáyivi cuví ñu tari nu canacoyo chiti yuhu ityi: chiñí ñu tuhun Nyoo, soco cha yaha chiñí ñu, quichi cuihna ta tinyaa ra tuhun Nyoo cha tachí ra añima ñu. <sup>16</sup>Inga ñáyivi cuví ñu tari nu canacoyo chiti ticu yuu: chiñí ñu tuhun Nyoo ta sií cuñí ñu natiin cuenda ñu noo ri cuhva. <sup>17</sup>Vatyí nu cañā chiti ticu yuu cuan, chiin ri ñuhú yihí chaha, yucuan chaha cañā soco ña cuví tyihi yoho vaha chi. Ta tyicuan caa ñu cuan, suhva ri quívi chino iñi ñu. Soco quívi vachi tindoho siqui ñu, o satasi iñi ñáyivi chi ñu cha cuenda tuhun Nyoo, sandíhi ri ñu tuhun cha chinó iñi ñu. <sup>18</sup>Ta inga ñu cuví ñu tari nu canacoyo chiti chichi tu iñu: chiñí ñu tuhun Nyoo, <sup>19</sup>soco cutyoño ca iñi ñu cha cuenda tindoho cha iyó siqui ñuhu ñáyivi ihya. Cha tyayíi sandaví ñaha chi ñu, ta cuñí ñu tandíhi ri nuu cha iyó. Tandíhi ihya quíhví xiñi ñu ta ña nyaá ca xiñi ñu tuhun Nyoo, ta ña chahá chi sacuvi ñu cha vaha cha cuenda cuan. <sup>20</sup>Soco yihí ñu cha chiñí ñu tuhun Nyoo ta naquehén cuenda ñu, ta vaha sacuví ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha cañā ta chahā tun

oco uchi tahan chiti tahan tahan tun. Ta inga ñu cuví ñu tari yutun cha chahā uñi xico. Ta inga ñu tari yutun cha chahā ciento.

**Ma tyihi xehe yo ñuhú cha  
sandundichin Nyoo añima yo coto  
tinyaa ra**

(Lc. 8.16-18)

<sup>21</sup>Ta catyí tucu ra chi ñu:

—¿Atu quichi nyaca yo noo tima vatyí cananyaa yo chichi noo cajón o xiu chito? Ñima. Tima cuan cuñí chi tyiso yo noo nu sucun vatyí na sacundichin chi chichi xehe. <sup>22</sup>Ta tyicuan caa tucu, ñahri cha ñohó xehe, ta cuñun, tyi ma natuvi. Ta ñahri noo tuhun xehe, ta cuñun, tyi ma coto yo. <sup>23</sup>Nyoho cha cutuñí iñi ndo, tyasoho ndo tuhun cahín — catyí ra Jesús chi ñu.

<sup>24</sup>Catyí tucu ra tyehe caa:

—Tyasoho vaha ndo tuhun cahín. Yoso cuhva sacuví ndo chi ñáyivi, yucuan cuhva sacuvi Nyoo chihin ndo. Ta cuaha ca cucuhva ra chi ndo tatu tyasohó ndo cha cahán ra. <sup>25</sup>Vatyí ñu tyasohó cha cahín, cuaha ca cuhva Nyoo chi ñu. Soco ñu ña tyasohó, cutinyaa ndíhi ra cha chiin cha cha yaha chahā ra chi ñu.

**Nu sañahá ra Jesús cuhva  
chahnu noo chiti yutun**

<sup>26</sup>Catyí tucu ra Jesús tyehe caa:

—Cha nyacá ñaha Nyoo añima ñáyivi cuví chi tari noo ra tachí noo chiti chichi ñuhú. <sup>27</sup>Ta cuahan ra cua cusu ra. Yaha cuan ta ndícuita ra. Ta cuaha quívi yaha. Ta cañā chiti cuan, ta chahnū yutun. Soco maa ra ña chitó ra yoso caa chahnū

tun. <sup>28</sup>Cha cuenda vatyí maa ñuhú cuan sacuvahá chi tun tyicuan ri caa. Xihna ca quita xityin tun, ta yaha cuan yoco tun, yaha cuan ta quita chiti nu yoco cuan. <sup>29</sup>Ta tatu cha chityi chiti cuan, cutohon ra vatyí cha cha quivi cha coyo — catyí ra Jesús.

**Nu sañahá ra Jesús vatyí tari chahnu noo chiti mostaza, tyicuan caa nducuaaha nu nyacá ñaha Nyoo**

(Mt. 13.31-32; Lc. 13.18-19)

<sup>30</sup>Ta catyí tucu ra Jesús: —¿Ñáá chihin sanandiqui tahin cha nyacá ñaha Nyoo añima yo? ¿Ñáá chihin sandu inuu ri yo? <sup>31</sup>Cuví chi tari noo chiti mostaza cha tachí yo nu ñuhú. Ican chiti cuan, lee ca cha nuu tandihí chiti iyó siqui ñuhu ñayivi. <sup>32</sup>Soco tatu tachí yo, cañá ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chicó nu tatyí cuví nyitatu ti nu vati tun.

**Yoso caa sañahá ra Jesús chihin cuhva ri chi ñáyivi**

(Mt. 13.34-35)

<sup>33</sup>Tyehe caa sañahá ra Jesús chi ñu, chihin cuaha cuhva, nyacua nya nu cuví cutuñi ñi ñu. <sup>34</sup>Ñahri maa cha catyí ra chi ñu tatu ñima chihin noo cuhva. Soco chi ra cachicá noo chihin ra, nacatyí vaha ra chi ra.

**Nu sacutaxín ra Jesús tatyí ta miñi**

(Mt. 8.23-27; Lc. 8.22-25)

<sup>35</sup>Suri maa quivi cuan, cuhva cha cuaq, catyí ra chi ra cachicá noo chihin ra:

—Coho ndo inga chiyo miñi cuan.

<sup>36</sup>Tyicuan ta casandoq ra chi ñáyivi. Ta cuahan ra Jesús chihin

ra chichi canoa cha catuvi cuan. Ta cuahan tucu inga canoa chihin ra.

<sup>37</sup>Ta quichaha caa noo tatyí ñihi xaan, ta quichaha quihvi ndutya chichi canoa cuan, ta quichaha chitu. <sup>38</sup>Ta ra Jesús quixí ra siqui noo cabecera cha nyaá inchiyo xiin canoa cuan. Ta casandoq ra chi ra, ta cacatyí ra:

—iMaestro! ¿atu ñahri cuendon cha cuñi nyee yo?

<sup>39</sup>Tyicuan ta ndicuita ra Jesús ta cahan ra chi tatyí cuan na cutaxin. Ta catyí ra chi ndutya miñi cuan tyehe caa:

—iTaxi ri! iTaxi cunyaun! —catyí ra.

Ta tatyí cuan cutaxin, ta taxi taxi cuví. <sup>40</sup>Tyicuan ta catyí ra Jesús chi ra cachicá noo chihin ra:

—¿Ñáá tuhun cha yuhvi xaan ndo? ¿Atu ta chino ca ñi ndo? — catyí ra chi ra.

<sup>41</sup>Soco maa ra cayuhvi xaan ra cha cuví cuan. Ta cacatyí ra chi ra tahan ra:

—¿Yóó ra cuví ra ihya, vatyí nyacua nya tatyí ta miñi quichahá chi ra? —cacatyí ra.

**Nu nduvahá ra yihí tatyí ña vaha chii ñuu Gadara**

(Mt. 8.28-34; Lc. 8.26-39)

**5** Chaq coyo ra yuhu miñi, inga chiyo nu nyaá ñuu Gadara.

<sup>2</sup>Ta quita ri ra Jesús chichi canoa, ta quita noo ra nu ñaña cuan ta chaq ra nu nanyaá ra Jesús. Ta yihí noo tatyí ña vaha añima ra. <sup>3</sup>Ta nu ñaña cuan iyó maa ra cuan. Ta yori maa cuví chasaha chi ra, ni ri chihin cadena. <sup>4</sup>Cuaha xaan chaha chahñi ñu chaha ra ta ndaha ra

chihin cadena, soco chahnya ra. Yiquin maa sacuvi ra. Ta yori maa cuví chasaha chi ra. <sup>5</sup>Ñicahñu ta cha cuaa chicá noo ra canachaá ra nya nu yucu ta nya nu ñaña. Ta sañicuehé ra suri chi maa ra chihin yuu. <sup>6</sup>Soco cañi ca nanyehē ra chi ra Jesús, ta chino vavaha ra chaa ra. Ta chicuiñi chiti ra nuu ra. <sup>7</sup>Ta cana chaa ra ta catyí ra:

—¿Ñáá tuhun cha tyihún chuun chihin yuhu, yoho Jesús, Sehe Nyoo ra cuví nuu? Chacú ndahvi nuun chihin sivi Nyoo, ma sanyehun tindoho chii.

<sup>8</sup>Catyí tatyí cuan tyehe caa vatyí ra Jesús cha catyí ra chi ra:

—¡Saña chi ra chiña, yoho tatyí ña vaha! —catyí ra.

<sup>9</sup>Ta ra Jesús ndaca tuhun ra chi ra, ta catyí ra:

—¿Ñáá nañún?

Ta nacahan tatyí ña vaha cuan:

—Legión nañí, vatyí cuaha xaan ndi —catyí chi chi ra Jesús.

<sup>10</sup>Ta chacu ndahvi tatyí ña vaha cuan nuu ra Jesús tacuhva cha ma tachi ra chi chi nu cañi. <sup>11</sup>Ta yatyin ri yucu cuan nyicú cuaha xaan quini cachachí ti. <sup>12</sup>Yucuan chaha catyí tatyí ña vaha cuan chi ra Jesús tyehe caa:

—Tachi chi ndi na quihvi ndi quini cuan —catyí tatyí cuan.

<sup>13</sup>Tyicuan ta chaha ra Jesús, ta tatyí cuan quita coyo chi ra cuan, ta quihvi chi quini cuan. Ta cha uvi mil quini nyicú cuan, cachino ti, ta canacooyo ti chichi noo xahva yuhu miñi cuan, ta cachihí ti chichi ndutya cuan.

<sup>14</sup>Tyicuan ta ra sahá cumi quini cuan, chino xaan ra chihin cha

yuhví ra, ta chinacatyí ra chi ñáyivi ñuu cuan ta ñu ñohó nu chiqui. Ta quichí coyo ñáyivi, quichí nyehe ñu ñáá cha cuví. <sup>15</sup>Cuhva cha cha coyo ñu nu nyaá ra Jesús, nanyehē ñu chi ra cha yihí tatyí ña vaha cuan chi. Ta vityin nyaá ra ñihno ra sahma, ta cachi vaha iyó xiñi ra. Ta yuhví xaan ñu cuví. <sup>16</sup>Ta ñu cha nyehe cha cuví chi ra cuan ta chi quini cuan, canacatyí ñu chi tandihí ca ñu. <sup>17</sup>Tyicuan ta quichaha chacu ndahvi ñu nuu ra Jesús, na quita ra ñuu ñu.

<sup>18</sup>Ta cuhva cha cua quihvi ra Jesús chichi canoa, ra cha yihí tatyí ña vaha cuan chi chacu ndahvi ra nuu ra Jesús na cuhva ra cuhun ra chihin ra. <sup>19</sup>Soco ra Jesús ña chaha ra cuhun ra, ta catyí ra chi ra:

—Cuanuhu nya vehun, nu nyaá ñáyivi chuun, ta nacatyun chi ñu tandihí cha sacuví Sutu yo Nyoo chuhun, ta yoso caa cundahvi cuñi ra nyehe ra chuun. <sup>20</sup>Ta ra cuan cuahan ra ta quichaha nacatyí ra chi ñáyivi tandihí ñuu Decápolis tandihí cha sacuví ra Jesús chihin ra. Ta tandihí ñu, iyo cuñí ñu.

#### **Nu nduvaha sehe ra Jairo ta ñaha sihi cha tiñ sahma ra Jesús**

(Mt. 9.18-26; Lc. 8.40-56)

<sup>21</sup>Ta cuhva cha nachaa ra Jesús chihin canoa nya inga chiyo miñi cuan, cha coyo cuaha ñáyivi nu nyaá ra. Ta ndoo ra yuhu miñi cuan. <sup>22</sup>Tyicuan ta cha noo ra cuví nuu vehe ñuhu. Nañí ra Jairo. Ta cuhva cha nanyehē ra chi ra Jesús, chicuiñi chiti ra nuu ra. <sup>23</sup>Ta chacu ndahvi ra nuu ra ta catyí ra:

—Cha cuñí cúvi sehi. Coho chihin ta tyison ndahun siqui ña na nduvaha ña ta ma cúvi ña.

<sup>24</sup>Tyicuan ta cuahan ra Jesús chihin ra, soco cuaha ñáyivi nyicón chi ra, ta nyacua ñāñi tahan ri ca maa ñu. <sup>25</sup>Ta mahñu ñáyivi cuan ñohó noo ñaha cha cuhví. Cha quita uchi uvi cuiya ndoho ña cuehe cha chatí ññi ña. <sup>26</sup>Ta cuaha tindocho nyehe ña cha cuaha xaan doctor nyehe chi ña. Ta cha sanaa ña tandíhi maa cha iyó chi ña, soco ñahri maa tyinyee chi chi ña. Soco ñihi ndíhi ca nanduvi. <sup>27</sup>Cuhva cha chitó ña tuhun milagru cha sacuví ra Jesús, tuhva ña ityi chata ra ta tññ ña sahma ra. <sup>28</sup>Vatyí chicá xiñi ña: “Ma chihin cha tññ ri sahma ra, ta nduvahi”, chicá xiñi ña. <sup>29</sup>Ta caa cuhva ri cha tññ ña sahma ra ta cha chatí ññi ña cutaxin. Ta tuví iñi coño ñuhu ña tyi cha nduvaha ña chihin cuehe cuan. <sup>30</sup>Tyicuan ta tuví iñi ra Jesús vatyí nduvaha noo ñáyivi chihin suhva tunyee iñi cha quitā chi ra. Tyicuan ta nanyehē ra ityi chata ra ta quichaha ndaca tuhun ra:

—¿Yóo cha tññ sahme? —catyí ra.

<sup>31</sup>Tyicuan ta ra cachicá noo chihin ra quichaha catyí ra chi ra:

—Cha nyehun vatyí ñáyivi tyandahá chuun tyi tññ xaan. ¿Yoso caa cha ndaca tuhun: “Yóo cha tññ chii”? —cacatyí ra chi ra.

<sup>32</sup>Soco ra Jesús nyehe ra ityi cuan ityi ihya, vatyí cuñí ra nyehe ra yóo cha tññ chi ra. <sup>33</sup>Tyicuan ta ñaha cuan nihí ña chihin cha yuhví ña vatyí chitó ña ñáá cha cuví chi ña. Ta chahan ña chicuñi chiti ña nuu ra. Ta nacatyí ña tandíhi cha ndicha chi ra. <sup>34</sup>Ta catyí ra Jesús chi ña:

—Cha nduvahun, Síhi, vatyí chinó iñun. Cuahan, ta ma caca xiñun,

vatyí cha nduvahun chihin cuehe cha ndohun —catyí ra Jesús chi ña.

<sup>35</sup>Ni cahán ca ra Jesús ta chaa coyo ñu vehe ra cuví nuu cuan, ta catyí ñu chi ra cha cuví sutu cha luhlu cuan:

—Sehun, cha chihí ña. Ñáá ri ca tuhun cha sayangon chi Ra Sacuaha chiña —catyí ñu.

<sup>36</sup>Soco ra Jesús ña quichaha ra cha cahan ñu, ta catyí ra chi ra cuví nuu vehe ñuhu cuan:

—Ma yuhvun. Chino iñun —catyí ra chi ra.

<sup>37</sup>Ta ña chaha ra yóo ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo. <sup>38</sup>Ta cuhva cha cachaa coyo ra vehe ra cuví nuu vehe ñuhu, nyehe ra cha chacú chaa ñáyivi ta caná chaa ñu. <sup>39</sup>Quihví ra ta catyí ra chi ñu:

—¿Ñáá tuhun cha iyo xaan cuví ndo, ta chacú ndo tyiña caa? Cuehe luhlu ihya, ña chihí cue, quixí cue —catyí ra chi ñu.

<sup>40</sup>Soco chacú cuehe ri ñu nyehe ñu chi ra. Tyicuan ta ra Jesús tava ra chi tandíhi ñu, ta quehen ra chi sutu cue ta síhi cue ta chi ra cha cha coyo chihin ra, ta quihví coyo ra nu catuví cue. <sup>41</sup>Ta tññ ra ndaha cue, ta catyí ra chi cue:

—Talita cumi —ta cuñí chi catyí cuan: Catyí chuun, yoho cuehe luhlu, indícuita!

<sup>42</sup>Ta caa cuhva ri cua ndicuita cuehe luhlu cuan. Iyó uchi uvi cuiya cue. Ta cuví nacaca cue. Ta ñáyivi iyó xaan cuñí ñu. <sup>43</sup>Soco ra Jesús ñihi chaha ra tuhun chi ñu, tyi ma cahan maa ñu tuhun, ta catyí ra chi ñu na cuhva ñu cha cachi cue.

**Nu ñohō ra Jesús ñuu Nazaret***(Mt. 13.53-58; Lc. 4.16-30)*

**6** Tyicuan caa cuvī ta quitā ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra. <sup>2</sup>Ta chaā quivī nyitatu ñáyivī, ta quichahā sañaha ra chichi vehe ñuhu. Ta cuaha ñáyivī chiñī tuhun cahán ra, ta iyo cuñī ñu, ta catyí ñu:

—¿Nya cutuhvā ra ihya tandihī tuhun ihya? ¿Yóo cha chahā cha chiñī tuñī ihya chi ra? ¿Yoso caa cha cuvī sacuvi ra milagru nahnu xaan ihya? <sup>3</sup>¿Atu ñima ra satyá vitu cuan cuvī ra? Sehe cu María cuvī chi ra. Ta yañi ra Jacobo, ta ra José, ta ra Judas, ta ra Simón, ta cuhva ra iyó tucu ñu chihin yo ihya —catyí ñu.

Ta quiñi cuñī ñu nyehe ñu chi ra.

<sup>4</sup>Soco catyí ra Jesús chi ñu:

—Tandihī ñu inga ñuu sahá ñu ñáyivī chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyivī chi ra —catyí ra Jesús.

<sup>5</sup>Ta ña cuvī sacuvi ra ni noo milagru yucuan, soco tyiso ra ndaha ra siqui suhva ri ñu cuhvī, ta sanduvahā ra chi ñu. <sup>6</sup>Ta iyo cuñī ra vatyí ñu ñuu ra ña chinó iñi ñu chi ra. Ta chahān ra tandihī ñuu nyihi cha nyicú yatyin ri cuan, ta sañahā ra.

**Nu tyatyíño ra Jesús chi ra cachicá noo chihin ra nu cucahan ra tuhun**

**Nyoo***(Mt. 10.5-15; Lc. 9.1-6)*

<sup>7</sup>Yahā cuan ta canā ra chi ndi uchi uvi ra chicá noo chihin ra, ta

quichahā tachi ra chi uvi uvi ra. Ta chahā ra ityi chi ra vatyí tava ñehe ra chi tatyí ña vaha yihí añima ñáyivī. <sup>8</sup>Ta catyí ra chi ra vatyí ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tuvi ra cuiso ra. <sup>9</sup>Ndichan ri quihi chaha ra. Ta noo ri sahma cuihno ra, ñima uvi tahan. <sup>10</sup>Ta catyí ra chi ra:

—Cuhva cha chaā ndo noo ñuu ta quihvi ndo noo vehe, ndoo ndo yucuan ri nyacua nya cha quita ndo ñuu cuan. <sup>11</sup>Ta tatu ñáyivī iyó noo ñuu, ña cuñī ñu tiin cuenda ñu chi ndo, ta ña cuñī ñu tyasoho ñu tuhun cahan ndo, quita ndo yucuan ta naquisi ndo ñiyaca chaha ndo tari noo seña vatyí ña vaha sacuví ñu. Cha ndicha catyí chi ndo, vatyí quivī cucutuñi chi ñáyivī iyó siqui ñuhu ñáyivī, ñu cha ma cuñi tiin cuenda tuhun cahan ndo, cuaha ca tindoho cunyehe ñu, ta ñima ca ñu ñuu Sodoma ta ñuu Gomorra —catyí ra Jesús chi ra.

<sup>12</sup>Tyicuan ta quitā coyo ra ta chichahān ra tuhun Nyoo chihin ñáyivī na ndu uvi iñi ñu cuatyí ñu, ta na nanducu ñu chi Nyoo. <sup>13</sup>Ta catavā ñehe ra cuaha tatyí ña vaha añima ñáyivī. Ta cahyū ra acetye chi cuaha ñu cuhvī ta casanduvahā ra chi ñu.

**Nu catyí chi yoso caa chihī ra Juan ra sacondutyá chi ñáyivī**

*(Mt. 14.1-12; Lc. 9.7-9)*

<sup>14</sup>Chito rey Herodes tuhun ra Jesús vatyí tandihī ñáyivī cahán ñu tuhun cha sacuví ra, ta chicá xiñi ra tyehē caa:

—Ra Juan ra sacondutyā chi ñáyivi cuví ra cuan. Nandotō ra cha yahā chihī ra, yucuan chaha iyó tunyee iñi chi ra —chicá iñi ra.

<sup>15</sup>Inga ñu catyí ñu:

—Ra Elías profeta Nyoo ta cha naha cuví ra ihya —catyí ñu.

Ta inga ñu catyí ñu:

—Inga profeta Nyoo cuví ra, tari ra profeta Nyoo ra chiyō ta cha naha.

<sup>16</sup>Cuhva cha chiñi ra Herodes tuhun ihya, catyí ra:

—Ican ra cuan cuví ra Juan cha tyihī tyiño tahnya sucun, ta vityin nandotō ra —catyí ra Herodes.

<sup>17</sup>Tyicuan caa catyí ra Herodes vatyí cha catyí cu Herodías, ta tyihī ra chi ra Juan vehe caa ta chahñi ra chi ra chihin cadena. Cu Herodías cuan, ñasihi ra Felipe, yañi ra Herodes, cuví chi ña. Soco ra Herodes quehen ra chi ña vatyí cuví ña ñasihi ra. <sup>18</sup>Ta ra Juan catyí ra chi ra Herodes vatyí ña vaha cha cunyaa ra chihin ñasihi yañi ra.

<sup>19</sup>Yucuan chaha cu Herodías tasi xaan cuñi ña nyehe ña chi ra Juan, ta cuñi ña cahñi ña chi ra, soco ña cuví. <sup>20</sup>Vatyí ra Herodes chitó ra vatyí ra Juan cuví ra noo ra vaha, ra ii, ta yuhví ra chi ra. Yucuan chaha sahá cuenda vaha ra chi ra, ña chahā ra cha sacuvi ña cha cuñí maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñí ra chiñí ra cha cahán ra. <sup>21</sup>Soco cu Herodías ñihī ña noo cuhva nu ndihi ra Herodes cuiya, vatyí sacoo ra noo vico cha cuenda ra cacuví tyiño, ta comandante cuenda sindaro, ta ra nahnu ca ityi Galilea cuan. <sup>22-23</sup>Ta

quihvi sehe cu Herodías vico cuan, ta quichaha chitā chaha ña. Ta tahañ xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyí cuhva ra ñáá cha cacan ña chi ra. Ta catyí ra chi ña:

—Cacan ñáá cha cuñun chii, ta cuhve chuun —catyí ra chi ña.

Ta catyí ra vatyí cuhva ra ñáá ri cha cacan ña, vasi sava ñuhú ñuu nu nyacá ñaha ra. <sup>24</sup>Quitā ña ta catyí ña chi sihi ña:

—¿Ñáá cha caquen chi ra? —catyí ña.

Ta catyí sihi ña:

—Cacan xiñi ra Juan ra sacondutyá —catyí ña chi sehe ña.

<sup>25</sup>Ta numi ri ndihvi ñaha tyivaa cuan nu nyaá rey Herodes, ta catyí ña chi ra:

—Cuñí vatyí cahnyon xiñi ra Juan ra sacondutyá ta tyihun nuu noo coho ta cuhvon chii vityin vityin —catyí ña chi ra.

<sup>26</sup>Tyicuan ta nducuihya xaan iñi rey cuan. Soco cha tyaa ra cuhva vatyí cuhva ra chi ña, ta siin ri cachiñi ra canyicú chihin ra, ta ña cuñí ra nacahnu ra cha catyí ra chi ña. <sup>27</sup>Numi ri tachí rey cuan tyiño chi noo sindaro na quichi nyaca ra xiñi ra Juan.

<sup>28</sup>Chahāñ sindaro cuan chichi vehe caa cuan, ta chahnyā ra xiñi ra Juan. Ta quichí nyaca ra, yihí nu noo coho. Tyicuan ta chahā ra chi ñaha tyivaa cuan, ta maa ña nacuhvā ña chi sihi ña.

<sup>29</sup>Cha chitō ra canyicón chi ra Juan, chahāñ coyo ra chinaquehen ra coño ñuhu ra, ta cachityihī ra chichi ñuhú.

### Nu chahā ra Jesús cha cachi ohon mil rayii

(Mt. 14.13-21; Lc. 9.10-17; Jn. 6.1-14)

<sup>30</sup>Yahā cuan ta ndu iñi ri ra cha tyatytiño ra Jesús chi chihin ra, ta

canacatyí ra tandíhi cha casacuví ra, ta cha casañaha ra nu chahan ra chichan ra tuhun Nyoo. <sup>31</sup>Ta catyí ra Jesús chi ra:

—Ñaha ndo, na nyitatu yo chiin noo nu taxi ri iyó —catyí ra chi ra.

Tyicuan caa catyí ra vatyí cuaha ñáyivi cuahan ta vachi ñu, ta nyacua ña cacuyatyí ra cha cacachi ra. <sup>32</sup>Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu yori maa ñáyivi nyicú, minoo nu taxi ri. <sup>33</sup>Soco cuaha ñu nyehé nu quitá ra. Ta canicohon nuu ñu chi ra. Ta cuahan coyo vavaha ñu chihin chaha ñu, quita ñu tandíhi ñuu ta xihna ca maa ñu chaá coyo. <sup>34</sup>Cuhva cha chaá ra Jesús, quita ra chichi canoa ta nanyehé ra tyi cuaha xaan ñu nyicú yucuan. Ta cundahvi cuñí ra nyehé ra chi ñu, vatyí nyicú ñu tari mbee cha yori ra sahá cumi chi ti. Ta quichaha sañaha ra cuaha tuhun chi ñu. <sup>35</sup>Cha cua iñi xaan, ta ra cachicá noo chihin ra catuhvā ra ta catyí ra chi ra:

—Cha iñi xaan, ta yucu taxin cuví ihya. <sup>36</sup>Çatyí chi ñu, na cuhun ñu ñuu cha nyicú yatyin ihya, ta sata ñu pan, vatyí ñahri cha cachi ñu iyó ihya —cacatyí ra chi ra.

<sup>37</sup>Soco nacahan ra Jesús, ta catyí ra:

—Cuhva maa ndo cha cachi ñu.

Canacahan ra ta catyí ra:

—Vasi saha tyiño ndi iñu yoo, soco ma caña xuhun cha cusata ndi pan cachi tandíhi ñu ihya.

<sup>38</sup>Ta catyí ra Jesús chi ra:

—¿Yoso tahan pan nyisó ndo? Cuahan ndo cua nyehé ndo.

Ta cuhva cha cachito ra yoso tahan, cacatyí ra chi ra:

—Ohon tahan pan ta uvi tiyaca.

<sup>39</sup>Tyicuan ta catyí ra na cunyicú noo noo ticuiti ñu nu cuhu cuii cuan. <sup>40</sup>Ta chicunycú ñu cuenda ciento ta cuenda uvi xico uchi ñu. <sup>41</sup>Tyicuan ta quehen ra Jesús ndi ohon tahan pan cuan ta ninduvi tiyaca cuan. Ta nanyehé ndaa ra andivi, ta nacuhvā ra tyahvi nyoo chi Nyoo, ta tahví ra pan cuan, ta chahā ra chi ra cachicá noo chihin ra na casacha ra. Tyicuan ta casacha ra chi ñáyivi cuan. Yaha cuan ta casacha tucu ra ninduvi tiyaca cuan chi ñu. <sup>42</sup>Tandíhi ñu cachachi ta ndaha iñi ñu. <sup>43</sup>Ta nyacua ndoo ca ta casacutū ra uchi uvi tica chihin yiquin pan ta tiyaca. <sup>44</sup>Ta ohon mil rayii cachachi pan cuan.

### Nu chicá ra Jesús nu miñi

(Mt. 14.22-27; Jn. 6.16-21)

<sup>45</sup>Tyicuan ta catyí ra Jesús chi ra cachicá noo chihin ra na quihvi coyo ra chichi canoa vatyí cuhun coyo ra ityi nuu nya inga chiyo miñi cuan ñuu Betsaida. Vatyí maa ra Jesús cunasacha xihna ra ñáyivi, tyicuan ta cuhun ra catyí ra. <sup>46</sup>Ta cha yaha cuahan coyo ra, ra Jesús cuahan ra nu yucu, cua cacan tahvi ra. <sup>47</sup>Ta cuhva cha cuaa, canoa nu ñohó ra cachicá noo chihin ra cha cuahan nya mahñu miñi cuan, ta ndoo noo tuhun ri maa ra. <sup>48</sup>Ta nyehé ra vatyí ña cacuví vaha casacaca ra canoa cuan vatyí ñihi xaan tatyí. Ta cha ñaa ca cuan tuhva ra Jesús chicá ra nu ndutya cuan. Ta saha ri ra cha cua yaha ra nu canoa cuan. <sup>49</sup>Soco cananyehé ra

chi ra, chicá ra nu ndutya. Ta cacuñi maa ra vatyí noo cha sayuhvi cuví, ta cacana chaa ra. <sup>50</sup>Vatyí tandíhi ra canyehe ra chi ra ta cayuhvi ra. Soco maa ra cahan ra chihin ra ta catyí ra:

—iSanyee ndo iñi ndo! iYuhu cuví! iMa yuhvi ndo! —catyí ra.

<sup>51</sup>Quihví ra chichi canoa nu canyicú ra, ta cutaxin tatyí cuan. Ta iyo xaan cacuñí ra <sup>52</sup>cha cuenda vatyí ta cutuñi ca iñi ra milagru cha sacuvi ra chihin pan, vatyí ni ndava ca añima ra.

**Nu sanduvaha ra Jesús chi ñu cuhví ñuu Genesaret**

(Mt. 14.34-36)

<sup>53</sup>Cayahá sava ra miñi cuan ta cachaa coyo ra ñuu Genesaret, ta cachahñi ra canoa cuan yuhu ndutya ri cuan. <sup>54</sup>Ta cha quitá coyo ri ra chichi canoa cuan, nicohon nuu ri ñáyivi chi ra Jesús. <sup>55</sup>Ta cachino vavaha ñu nicahnu ityi cuan sacotó ñu vatyí chaá ra. Ta quichi coyo ñu tandíhi ri ñuu, quichi nyaca ñu chi ñu cuhví chihin chito nya nu nyaá ra Jesús. <sup>56</sup>Ta tandíhi ri ityi nu quihvi ra chichi ñuu luhlu o chichi ñuu nahnu, o chichi cuhu, chacun ñu chi ñu cuhví yuhu ityi. Ta chacu ndahvi ñu nuu ra na cuhva ra cha tiin ñu vasi chiin yuhu sahma ra. Ta tandíhi ri ñu tiin chi ra, nduvaha ñu.

**Nu sañahá ra Jesús ñáa cha sativí chi ñáyivi**

(Mt. 15.1-20)

**7** Yahá cuan ta ra fariseo ta suhva ra sacuahá cuenda ley vehe ñuhu quichi coyo ra nya

ñuu Jerusalén, ta catuhva ra chi ra Jesús. <sup>2</sup>Ta canyehe ra vatyí yihí ra cachicá noo chihin ra Jesús cachachí ra ta ña nacatya ra ndaha ra tari cuhva cha tahán chi cha costumbre. Yucuan chaha cacahan nyaa ra chi ra. <sup>3</sup>Vatyí ra fariseo ta tandíhi ñu Israel cuan nyicón ca ñu costumbre sutu chahnu ñu, vatyí ma cachi ra tatu ma ndoo ndaha ra cuaha chaha tari cuhva costumbre iyó chi ñu. <sup>4</sup>Ta tatu nachaa coyo ñu cha chahan ñu nuyahvi, ma cachi ñu tatu ma sacuvi ñu cuhva cuan cha canacatya xaan ñu ndaha ñu. Ta iyó cuaha ca costumbre cha canyicón ñu. Iyó noo cuhva cha tahán chi nacatya ñu vasu, jarra, ta tandíhi ndaha tyiño caa cha iyó chi ñu ta cama ñu ñandíhi. <sup>5</sup>Tyicuan ta ra fariseo ta ra sacuahá cuenda ley cuan candaca tuhun ra chi ra Jesús, ta catyí ra:

—¿Ñáa tuhun ña sacuví ra nyicón chuun cuhva costumbre sutu chahnu yo? Vatyí ña nacatya ra ndaha ra tari cuhva tahán chi tatu cuacachi ra xita —catyí ra chi ra.

<sup>6</sup>Ta nacahan ra Jesús, ta catyí ra: —Ndicha cha cahan ra Isaías tuhun ndo vatyí sahá ndo tyi vaha ndo ta ña ndicha ndo. Catyí ra tyehe caa: Ñáyivi ihya, chihin yuhu ri ñu catyí ñu tyi cuñí ñu chii. Soco ñima chihin cha tandíhi añima ñu, tyi siin nu nyaá xiñi ñu.

<sup>7</sup>Ñahri maa tuhun cha sacahnú ñu chii, vatyí cha sañahá ñu chi tahan ñu, maa maa ri maa cuhva sañahá ñáyivi ri cuví, tyaá ra Isaías tuhun ndo.



<sup>8</sup>Vatyi nyoho sandoó ndo cuhva catyí Nyoo, ta nanyicón ndo cuhva costumbre ñáyivi ri, tuhun cha nacatya xaan ndo ndaha tyiño ndo, ta cuaha cha tyicuan caa sacuví ndo. <sup>9</sup>Nyoho sanducaxiijn ndo tuhun cha catyí Nyoo tyi sacuvi ndo, tacuhva vatyi cuvi sacuvi ndo costumbre cha iyó ndo. <sup>10</sup>Soco ra Moisés catyí ra nu ley cha tyaa ra: “Saha ndo ñáyivi chi sutu ndo ta chi sihi ndo.” Ta catyí tucu ra: “Tandíhi ñu cha cahán ña vaha chi sutu o chi sihi ñu, tahán chi cúvi ñu.” catyí ra Moisés nu ley Nyoo. <sup>11</sup>Soco nyoho catyí ndo tyi noo ñáyivi cuvi catyí ñu chi sutu ñu o chi sihi ñu tyi ma cuvi tyinyee ñu chi ñu vatyi tandíhi cha iyó chi ñu Corbán cuví. (Cuñí chi catyí: “Cha चाहि chi Nyoo cuví.”) <sup>12</sup>Ta tatu catyí ñu tyicuan caa, ña cuñí ca chi cha tyinyee ñu chi sutu ñu o chi sihi ñu catyí ndo. <sup>13</sup>Ta tyicuan caa sacuachiyó ndo tuhun cha catyí Nyoo tyi sacuvi ndo, vatyi cuñí ndo sacuvi ri maa ndo tuhun cha iyó ndo. Ta cuaha ca cha inuu ri caa sacuví ndo —catyí ra Jesús.

<sup>14</sup>Tyicuan ta cana tucu ra Jesús chi ñáyivi ta catyí ra chi ñu:

<sup>15</sup>—Tyasoho vaha tandíhi ndo tuhun cahín, ta natyihí tuñi iñi ndo. Cha quihví yuhu ñáyivi ta chachí ñu, ña cuví sativi chi chi ñu. Soco cha quitá aña ñu, ican cuan sativi chi ñu. <sup>16</sup>Nyoho cha cutuñí iñi ndo, tyasoho ndo tuhun cahín —catyí ra Jesús chi ñu.

<sup>17</sup>Tyicuan ta sandoo ra Jesús chi ñáyivi cuan, ta quihví ra chichi vehe. Ta ra cachicá noo chihin ra candaca tuhun ra chi ra ñáá cha

cuñí chi catyí tuhun cuan. <sup>18</sup>Ta catyí ra Jesús chi ra:

—Tu tyicuan caa, ni nyoho, ña cutuñí iñi ndo. ¿Atu ña cutuñí iñi ndo vatyi cha quihví chichi yuhu yo ña sativi chi chi yo? <sup>19</sup>Vatyi ñima aña yo quihví chi, soco chichi yo. Ta yaha cuan ta quita chi chichi coño ñuhu yo —catyí ra Jesús.

Chihin cuan cuñí ra catyí ra vatyi tandíhi nyayu ta vaha cachi yo.

<sup>20</sup>Ta catyí tucu ra:

—Cha quitá aña ñáyivi, ican cuan sativi chi ñu. <sup>21</sup>Vatyi aña ñu quitá cha ña vaha chicá xiñi ñu, ta sacuví ñu cha ña vaha. Yihí ñu iyó ñu chihin rayi o chihin ñusihi ta ñima ñasihi ra cuví, ta ñima yii ñu cuví. Yihí ñu casuhú ñu. Yihí ñu cachahñi ñu. <sup>22</sup>Yihí ra iyó ñasihi ra ta chicá noo ra chihin inga ñu. Yihí ñu quichi cuvi iñi ñu cha chii inga ñáyivi. Yihí ñu sacuví ñu cha quiñi caa. Yihí ñu sandaví ñaha ñu. Yihí ñu iyó viciu chi ñu. Yihí ñu nyiyo iñi ñu. Yihí ñu ñii ñu cuendu. Yihí ñu cahnu sahá ñu chi ñu. Yihí ñu ña chaa cha chiñi tuñi xiñi ñu. <sup>23</sup>Tandíhi tuhun ña vaha ihya, quitá chi ityi chichi aña ñáyivi, ta sativi chi chi ñu —catyí ra chi ra.

**Noo ñaha inga ñuu cha chino iñi chi ra Jesús**

(Mt. 15.21-28)

<sup>24</sup>Yaha cuan ta quita ra Jesús yucuan, ta cuahan ra ityi ñuu Tiro ta Sidón. Quihví ra chichi noo vehe ta ña cuñí ra cha coto ni noo ñáyivi, soco ña cuví tixehe nuu ra. <sup>25</sup>Ta sihi noo ñaha tyivaa cha yihí noo tatyí ña vaha aña, numi ri chito

ña tuhun ra Jesús. Ta chaa ña ta chicuiñi chiti ña nuu ra. <sup>26</sup>Ñaha cuan, ñaha inga ñuu cuví ña, ñaha ñuu Sirofenicia cuví ña. Quichi ña ta chacú ndahvi ña nuu ra Jesús na tava ra tatyí ña vaha cha yihí ańima sehe ña. <sup>27</sup>Soco catyí ra Jesús chi ña:

—Saña, nacachi xihna ca ñu Israel ñu cuví sehe Nyoo, vatyí ña vaha cha tinyaá yo pan chi sehe yo ta cuhva yo cachi ina —catyí ra Jesús chi ña.

<sup>28</sup>Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

<sup>29</sup>Tyicuan ta catyí ra Jesús chi ña:

—Vaha nacahun. Ta cha cuenda cuan cuví cahun, vatyí tatyí ña vaha cha yahá quitá chi ańima sehun —catyí ra chi ña.

<sup>30</sup>Ta cuhva cha nachağ ña vehe ña, catuví sehe ña nu chito, ta tatyí ña vaha cuan cha yahá quitá chi cue.

#### Nu sanduvaha ra Jesús chi noo ra soho ta ñihí

<sup>31</sup>Ta quitá tucu ra Jesús ñuu Tiro, ta yahá ra ñuu Sidón, ta cuahan ra ityi ñuu cha canañ Decápolis, ta nachağ ra miñi Galilea. <sup>32</sup>Nu nyaá ra Jesús yucuan, quichi nyaca ñu chi noo ra soho ta ña cuví vaha cahán ra. Ta chacu ndahvi ñu nuu ra Jesús na tyiso ra ndaha ra siqui ra. <sup>33</sup>Tava šiın ra Jesús chi ra ĩn chiyo xiin, nu yori ñáyivi, ta tyihí ra nundaha ra chichi soho ra, ta tyaa šiı ra nu yaa ra. <sup>34</sup>Yucuan ta nanyehę ndaa ra andivi. Ta naxitá ra tatyí ra, ta catyí ra:

—iEfata! —ta cuñi chi catyí: iNuña! —catyí ra.

<sup>35</sup>Ta chihin cuan nuña soho ra soho cuan, ta nduvaha yaa ra, ta nacahan vaha ra. <sup>36</sup>Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihí ca canacatyí ñu.

<sup>37</sup>Ta iyo cuñi ñu ta catyí ñu:

—Tandihi ta vaha sacuví ra.

Nyacua cuvi nacuiñi ñáyivi soho sahá ra ta cuví tucu nacahan ñáyivi ñihí ñandihí.

#### Nu chaha ra Jesús cha cachi cumi mil ñáyivi

(Mt. 15.32-39)

**8** Quivi cuan nataca tucu cuaha xaan ñáyivi. Ta ñahri maa cha cachi ñu iyó. Tyicuan ta cana ra Jesús chi ra cachicá noo chihin ra, ta catyí ra:

<sup>2</sup>—Cundahvi cuñi nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu iyó. <sup>3</sup>Tatu natachi chi ñu nya vehe ñu cucachi ñu, coto coñaa ñu ityi, vatyí yihí ñu cañi quichi coyo ñu —catyí ra Jesús chi ra.

<sup>4</sup>Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáyivi iyó ta xico ñu chí yo?

<sup>5</sup>Ta ndaca tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

<sup>6</sup>Ta catyí ra na cunyicu ñáyivi cuan nu ñuhú. Ta quehen ra ucha pan cuan, ta nacuhva ra tyahvi

nyoo chi Nyoo. Yaha cuan ta tahvi sava ra pan cuan, ta chaha ra chi ra cachicá noo chihin ra, na casacha ra chi ñáyivi cuan. <sup>7</sup>Ta canyisó tucu ra suhva tiyaca nyihi. Ta nacuhva tucu ra Jesús tyahvi nyoo chi Nyoo, ta chaha ra chi ra na casacha ra. <sup>8</sup>Tandihi ñu cachachi ñu, ta cachitu chichi ñu. Ta casacutu ra ucha tahan tica chihin yiquin cha ndoo ca. <sup>9</sup>Ta cha cumi mil tahan ñu cachachi. Yaha cuan ta catyí ra Jesús chi ñu na cunuhu coyo ñu. <sup>10</sup>Ta quihví ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

**Nu cacatyí ra fariseo chi ra Jesús na sacuvi ra noo milagru**

(Mt. 16.1-4; Lc. 12.54-56)

<sup>11</sup>Tyicuan ta cachaá coyo ra fariseo, ta quichaha cuvi yuhu ra chihin ra Jesus. Ta cacatyí ra chi ra na sacuvi ra noo milagru tatu ndicha cha Nyoo tachí chi ra. Tyicuan caa catyí ra vatyí cuñí ra nducu nyehe ra chi ra. <sup>12</sup>Ta ra Jesús uhvi uhvi naxitá ra tatyí ra, ta catyí ra:

—¿Ñáá tuhun cha chicán ñáyivi iyó vityin milagru? Cha ndicha catyí chi ndo vatyí ma sacuvi ni noo milagru nyehe ndo —catyí ra chi ra.

<sup>13</sup>Tyicuan ta sandoo ra chi ra, ta nandihvi ra chichi canoa ta cuahan ra inga chiyo miñi.

**Cuhva iyó ra fariseo tari yuchan iya cuvi, catyí ra Jesús**

(Mt. 16.5-12)

<sup>14</sup>Naa iñi ra cachicá noo chihin ra Jesús cacuiso ra cha cacachi ra.

Ta noo pan ri ñohó chihin ra chichi canoa cuan. <sup>15</sup>Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra Herodes —catyí ra chi ra.

<sup>16</sup>Ta ra cachicá noo chihin ra quichaha cacatyí ra chi ra tahan ra:

—Cha cuenda vatyí ñahri pan nyisó yo, yucuan cuenda cahan ra tuhun cuan —catyí ra chi ra tahan ra.

<sup>17</sup>Tuví iñi ra Jesús cha ndatuhún ra, ta catyí ra chi ra:

—¿Ñáá tuhun cha catyí ndo tyi ñahri pan nyisó ndo? ¿Atu ta cutuñi ca iñi nyoho? ¿Atu ta coto ca ndo? ¿Atu ni ndava xaan añima ndo? <sup>18</sup>Nyaá chiti nuu ndo, ¿atu ña nyehé ndo? Nyaá soho ndo. ¿Atu ña chiñí ndo? ¿Atu ña nicohon iñi ndo <sup>19</sup>quivi cha saché ohon tahan pan cuan chi ndi ohon mil rayi? ¿Yoso tahan tica yiquin naquehen ndo? —catyí ra Jesús, ndacá tuhun ra chi ra cachicá noo chihin ra.

Ta maa ra cacatyí ra:

—Uchi uvi.

<sup>20</sup>Ta catyí tucu ra Jesús chi ra:

—Ta quivi saché ucha tahan pan chi cumi mil ñu, ¿yoso tahan tica tyitu nacoñehé ndo?

Ta cacatyí ra:

—Ucha tahan.

<sup>21</sup>Tyicuan ta catyí ra Jesús chi ra:

—¿Atu ta cutuñi ca iñi ndo? —catyí ra chi ra cachicá noo chihin ra.

**Nu sanduvahá ra Jesús chi noo ra cuaa ñuu Betsaida**

<sup>22</sup>Yaha cuan ta chaá ra Jesús chihin ra cachicá noo chihin ra

nya ñuu Betsaida. Ta quichĭ nyaca ñu chi noo ra cuaa. Ta cachacu ndahvi ñu nuu ra na tiin ra chi ra. <sup>23</sup>Tyicuan ta tiin ra ndaha ra cuaa cuan, ta cuahan ra chihin ra ityi chata ñuu. Ta tyaa sii ra chiti nuu ra, ta tyiso ra ndaha ra siqui ra, ta ndaca tuhun ra chi ra tatu cuvĭ nyehe ra chiin. <sup>24</sup>Ra cuaa cuan nanyehĕ ra ta catyĭ ra:

—Nyhĭ in cahnu ri maa chi ñáyivi. Cuhva caa yutun caa ñu cahvi iñi, soco chicá ñu —catyĭ ra.

<sup>25</sup>Tyicuan ta tiin tucu ra Jesús chiti nuu ra inga chaha, ta maa ra nanyehĕ vaha ra ta nduvaha ra. Nanyehĕ cachi vaha ra tandihĭ.

<sup>26</sup>Tyicuan ta natachi ra Jesús chi ra ta catyĭ ra chi ra:

—Ma quĭhvun chichi ñuu ta ni yori chihin cahun tuhun.

### Nu catyĭ ra Pedro vatyĭ ra Jesús cuvĭ Cristo

(Mt. 16.13-20; Lc. 9.18-21)

<sup>27</sup>Yaha cuan ta chahan ra Jesús chihin ra cachicá noo chihin ra ñuu cha ca iyó Cesarea Filipo. Ta ityi cuahan ra, ta ndaca tuhun ra chi ra cachicá noo chihin ra, ta catyĭ ra:

—¿Ñáá catyĭ ñáyivi? ¿Yóó ra cuvĭ yuhu? —catyĭ ra chi ra.

<sup>28</sup>Ta canacahan ra ta catyĭ ra:

—Yihĭ ñu catyĭ ñu tyi ra Juan ra sacondutyá chi ñáyivi cuvún. Inga ñu catyĭ ñu tyi ra Elías cuvún. Ta inga ñu catyĭ ñu tyi inga ra profeta Nyoo cuvún —cacatyĭ ra chi ra.

<sup>29</sup>Tyicuan ta ndaca tuhun ra chi ra, ta catyĭ ra:

—¿Ta nyoho, yóó ra cuvĭ yuhu, cuñĭ tucu nyoho?

Ra Pedro catyĭ ra chi ra:

—Yoho cuvĭ Cristo.

<sup>30</sup>Soco catyĭ ra Jesús chi tandihĭ ra tyi yori chihin cacahan ra tuhun cuan.

### Nu cahān ra Jesus tuhun tyi cucúvi ra

(Mt. 16.21-28; Lc. 9.22-27)

<sup>31</sup>Tyicuan ta quichaha sañaha ra vatyĭ Rayĭi cha quichĭ nya gloria cunyehe ra cuaha xaan tindoho. Ta ra mandoñi ta ra cacuvĭ nuu chi tata sutu ta ra casacuahá cuenda ley vehe ñuhu ma cuñĭ ra natiin cuenda ra chi ra. Catyĭ ra Jesús chi ra vatyĭ cucahñi ñu chi ra soco chichi cha cu uñi quivi cunandoto ra. <sup>32</sup>Catyĭ cachi ra chi ra tuhun ihya. Tyicuan ta tava siin ra Pedro chi ra ta quichaha catyĭ ra tyi ña vaha cha cahan ra cha tyicuan caa. <sup>33</sup>Soco ra Jesús nanyocava ra, ta nanyehĕ ra chi inga ra cachicá noo chihin ra. Ta quichaha cahan ra chi ra Pedro ta catyĭ ra:

—iCuachiyo chuun nui, cuihna! Vatyĭ yoho ña chicá xiñun tari cuhva chicá xiñi Nyoo, soco tari chicá xiñi ñáyivi, chicá xiñun —catyĭ ra Jesús chi ra Pedro.

<sup>34</sup>Tyicuan ta canā ra Jesús chi ñáyivi ta chi ra cachicá noo chihin ra ta catyĭ ra chi ñu:

—Tatu nya ndo cuñĭ ndo cunyicon ndo chii, cuñĭ chi cahnya ndo iñi ndo tuhun maa ndo. Ta ma ndu uvi iñi ndo cha yihĭ ndo cuende vasi nyehe ndo tindoho cha cuende. Vatyĭ yucuan cuvĭ cruzi cha tahn chi cuiso ndo. <sup>35</sup>Vatyĭ nya ndo ña cuñĭ ndo cuvĭ ndo cha cuende, suri cha cuvĭ maa ndo cuvĭ, ta cahun ndihĭ ndo anyaya. Soco nya ndo

cuhva ndo ñayiví ndo cha cuende ta cha cuenda tuhun Nyoo, cucacu añima ndo. <sup>36</sup>Tatu sacunaa ndo añima ndo anyaya, ¿ñáá ri tuhun cha saha ganaa ndo tandihí cha tyayii cha iyó siqui ñuhu ñayiví? <sup>37</sup>Vatyi tatu sacunaa ndo añima ndo, ñahri maa cha iyó cha cuví cuhva ndo ta sacacu ndo añima ndo. <sup>38</sup>Tatu nya noo ndo cucahan nuu ndo nyehe ndo chii, ta cucahan nuu ndo tuhun cahín nuu ñáyivi cha iyó cuatyí ta ña quichahá tuhun Nyoo, yuhu Rayii cha quichí nya gloria cucahan tucu nuu mai nyehi chi ndo quivi quichi tiqui chihin ángel cuenda Nyoo. Vatyi cuquichi chihin cha tyaqui maa Suti.

**9** 'Cha ndicha catyí chi ndo, vatyi yihí ndo cha nyicú ndo ihya, ma cúvi ñaha ndo nyacua nya nyehe ndo yoso caa nyacá ñaha Nyoo. Vatyi cuquichi chihin tunyee iñi ra —catyí ra Jesús.

**Nu sañahá Nyoo yoso caa ra Jesús noo cha ndicha nu nyacá ñaha ra**

(Mt. 17:1-13; Lc. 9:28-36)

<sup>2</sup>Iñu quivi yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chihin ra. Ta yucuan nasamā cuhva caa nuu ra Jesús. <sup>3</sup>Nduxíño xaan sahma ra ta cuichin xaan nanduví. Yori maa siqui ñuhu ñayiví ihya cuví nacatya ta nducuichin tyicuan caa. <sup>4</sup>Ta cananyehe ra tyi nanyaá ra Elías ta ra Moisés, candatuhún ra chihin ra Jesús. <sup>5</sup>Tyicuan ta ra Pedro catyí ra chi ra Jesús:

—Maestro, ivaha xaan cha nyicú ndi ihya! Na savaha ndi uñi tahan

tiyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyí ra Pedro, <sup>6</sup>vatyi ña chitó ra ñáá tuhun cahán ra. Vatyi maa ra ta inga ra cayuhví ra.

<sup>7</sup>Tyicuan ta noo xica noo vico siqui ra ta sahví chi ra. Ta chichi vico cuan tyacu noo ndusu cha catyí:

—Ican ihya cuví Sehi, ta cuñí xain chi ra. Tyasoho ndo tuhun cahan ra —catyí ndusu cuan.

<sup>8</sup>Ta cuhva cha cananyehe ra, yori ca ra tayucú chihin ra, noo ri ca maa ra Jesús.

<sup>9</sup>Cuhva cha cuanoo coyo ra yucu cuan, catyí ra Jesús chi ra tyi ma cacahan ra tuhun cha canyehe ra yucuan, soco nya yaha cha nandoto Rayii cha quichi nya gloria, tyicuan ta cuví cahan ra tuhun. <sup>10</sup>Yucuan chaha ña cacahan maa ra tuhun, vasi cacatyí ra chi tahan ra ñana vaha tuhun cuví cha cunandoto ra. <sup>11</sup>Tyicuan ta quichahā candaca tuhun ra chi ra Jesús:

—¿Ñáá tuhun cha catyí ra casacuahá cuenda ley vehe ñuhu vatyi cuquichi xihna ca ra Elías?

<sup>12</sup>Ta nacahan ra, ta catyí ra:

—Cha ndicha vatyi xihna ca ra Elías nyaá quichi ta sanduvaha ra tandihí. ¿Ta yoso caa catyí tuhun Nyoo cuenda Rayii cha quichi nya gloria? Catyí chi tyi cunyehe ra tindhó, ta ma cuñi nyehe ñáyivi chi ra. <sup>13</sup>Soco yuhu catyí chi ndo tyi cha yahā quichí ra Elías. Ta sacuví maa ñáyivi cha cuñi ñu chihin ra, tari cuhva catyí nu tutu Nyoo cha cucuvi chi ra —catyí ra Jesús chi ra.

**Nu sanduvahā ra Jesús chi noo ra tyivaa cha yihí noo tatyí ña vaha chi**

(Mt. 17.14-21; Lc. 9.37-43)

<sup>14</sup>Yahā cuan ta nachaa coyo ra nu nyicú inga ra cachicá noo chihin ra Jesús. Ta canyehe ra tyi cuaha ñáyivi tayucú nicachico. Ta nyicú tucu ra sacuahá cuenda ley yucuan, ta cacuví yuhu ra chihin ra. <sup>15</sup>Tyicuan ta cha nanyehe ñu chi ra Jesús, tandihí ñu iyo cuñí ñu, ta cachino ñu chichuva ñu nocumi chi ra. <sup>16</sup>Tyicuan ta ndaca tuhun ra Jesús chi ra cacuvi yuhu cuan ta catyí ra:

—¿Náá cuenda cuví yuhu xaan ndo? —catyí ra chi ra.

<sup>17</sup>Ta noo ra nanyaá chichi cha cuaha ñáyivi yucuan, nacahan ra ta catyí ra:

—Maestro, ihya vachi nyaque chi sehi. Yihí noo tatyí ña vaha chi cue ta sacuñihí chi cue. <sup>18</sup>Vatyí tandihí ri nu tiin tatyí cuan chi cue, sanduva chi cue nu ñuhú, ta yucuan quita tiñi yuhu cue ta cahñi noho cue. Ta ndundava cue. Cha catyí chi ra cachicá noo chuhun na tava ra tatyí ña vaha cuan, soco ña cacuví chi ra —catyí ra cuan chi ra Jesús.

<sup>19</sup>Nacahan ra Jesús ta catyí ra:

—iNyoho ñu ña chinó iñi cuví ndo! ¿Yoso tahan ca quivi cunyai chihin ndo ta cunyei tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi ra luhlu chiña tyehe —catyí ra.

<sup>20</sup>Quichí nyaca ra chi ra luhlu cuan. Ta cuhva cha nanyehe tatyí

cuan chi ra Jesús, quehen tatyí cuan chi cue. Ta nduva cue nu ñuhú, sacañuhú cue chi cue, ta quita tiñi yuhu cue. <sup>21</sup>Tyicuan ta ndaca tuhun ra Jesús chi sutu cue:

—¿Ama quichaha cuvi chi ra tyehe caa? —catyí ra chi ra.

Ta nacahan sutu cue, ta catyí ra:

—Nyata luhlu ra. <sup>22</sup>Ta cuaha chaha tyihí tatyí ña vaha ihya chi cue nu cayú ñuhú, o nu ndutya. Cuñí chi cahñi chi chi cue. Soco tatu cuví chuun, cundahvi cuñi nyehun chi ndi, ta tyinyeun chi ndi —catyí sutu cue chi ra Jesús.

<sup>23</sup>Ta catyí ra Jesús chi ra:

—Tatu chinó iñun, tandihí ta cuví cha cuenda ñu chino iñi —catyí ra Jesús.

<sup>24</sup>Tyicuan ta sutu cue canachaa ra ta catyí ra:

—iChinó iñi! iTyinyee chii na chino ca iñi! —catyí ra chi ra Jesús.

<sup>25</sup>Cuhva cha nyehé ra Jesús tyi cuaha ñáyivi candu iin ri, ta tava ñehe ra chi tatyí ña vaha cuan, ta catyí ra:

—Yoho tatyí ña vaha cha sañihí ta sasohó chi cue ihya, catyí chuun, na quiton. Saña chi ra luhlu ihya, ta ma ndihvi con chi ra —catyí ra Jesús chi tatyí ña vaha cuan.

<sup>26</sup>Ta tatyí cuan quiñi xaan canachaa ta na quisi chi chi cue inga chaha ta quita. Ta sandoq tatyí cuan chi cue tari noo ndiyi. Ta cuaha ñu catyí vatyí cha chihí cue. <sup>27</sup>Soco tiin ra Jesús ndaha cue, ta nacoñehé ra chi cue, ta nicuinanyaa cue.

<sup>28</sup>Tyicuan ta quihvi ra Jesús noo vehe, ta ra cachicá noo chihin ra candaca tuhun ra chi ra ta catyí ra:

—¿Ñáá tuhun ña cuvī tava ndi chi tatyī ña vaha cuan?

<sup>29</sup>Ta catyī ra Jesús:

—Cha cuenda vatyī tahan tatyī ña vaha ihya, quitá, soco chihin cha ma cachi yo ta cacān tahvi yo chi Nyoo —catyī ra chi ra.

**Nu cahán ra Jesús tuhun inga chaha vatyī cucúvi ra**

(Mt. 17.22-23; Lc. 9.43-45)

<sup>30</sup>Quivi cha quitá coyo ra yucuan, yahá coyo ra ityi Galilea. Ta ña cuñí ra Jesús cha coto ñáyivi. <sup>31</sup>Vatyī sañahá ra chi ra cachicá noo chihin ra. Ta catyī ra chi ra vatyī Rayīi cha quichi nya gloria cunacuhva cuenda ñu chi ra ndaha ñáyivi. Ta cucahñi ñu chi ra, soco cha cu uñi quivi cunandoto ra. <sup>32</sup>Soco ña cacutuñí iñi ra tuhun cahán ra chihin ra. Ta cayuhví ra candaca tuhun ra chi ra.

**¿Yóó ra cahnu ca?**

(Mt. 18.1-5; Lc. 9.46-48)

<sup>33</sup>Tyicuan ta cachaa coyo ra ñuu Capernaum. Ta cuhva cha nyicú ra nya vehe, ra Jesús ndaca tuhun ra chi ra ta catyī ra:

—¿Ñáá tuhun cuvī xaan yuhu nyoho ityi vachi yo? —catyī ra ndaca tuhun ra.

<sup>34</sup>Taxi taxi cacuvi ra, vatyī ityi vachi coyo ra, ta cacuví yuhu ra nya ra cuví ra ra cahnu ca.

<sup>35</sup>Tyicuan ta chicunyaā ra Jesús ta canā ra chi ndi uchi uvi ra chicá noo chihin ra, ta catyī ra chi ra:

—¿Nya ndo cuñí ndo cuví ndo nuu, cuñí chi cha cuví ndo ra nu ndihi cha nuu tandihi ra, ta sacuvi ndo tyiño nuu tandihi ra? —catyī ra Jesús chi ra.

<sup>36</sup>Tyicuan ta quehen ra chi noo ra cuehe luhlu ta chinanyaā ra chi cue mahñu ra. Ta tyihī sucun ndaha ra chi cue, ta catyī ra:

<sup>37</sup>—Ñáyivi cha natiín cuenda chi noo ra cuehe luhlu chihin sivi, chi yuhu natiín cuenda ñu. Ta ñu natiín cuenda chii, ñima chi yuhu ri natiín cuenda ñu, soco chi ra cha tachī chii ñandihī.

**Tatu ña cuahan ñáyivi siqui yo, tumañi iñi chi yo cuahan ñu**

(Mt. 10.42; Lc. 9.49-50)

<sup>38</sup>Tyicuan ta catyī ra Juan chi ra Jesús:

—Maestro, nyehe ndi chi noo ra cuan ta chihin sivun tavá ñehe ra chi tatyī ña vaha. Soco vatyī ñima chihin yo chicá noo ra, catyī ndi chi ra tyi ma sacuvi ca ra —catyī ra Juan chi ra Jesús.

<sup>39</sup>Soco catyī ra Jesús chi ra:

—Ma casi ndo. Vatyī ni noo ra cha casacuvi milagru chihin sivi ta yaha cuan ta caña iñi ra cahán ña vaha ra siqui. <sup>40</sup>Vatyī ñu cha ña cuahan siqui yo, tumañi iñi chi yo cuahan ñu. <sup>41</sup>Tatu cuhva noo ñu, vasi noo vasu ndutya coho ndo chihin sivi, cha cuenda vatyī ñu cuenda yuhu ra Cristo cuví ndo, cha ndicha vatyī cuñihi ñu cha cuacuhva Nyoo chi ñu.

**Yica xaan cha sanacava yo chi noo yañi yo nu cuatyī**

(Mt. 18.6-9; Lc. 17.1-2)

<sup>42</sup>Tatu yóó ñu sanacava nu cuatyī chi noo ñu chinó iñi chii, vaha taxin ca cuhñi ñáyivi noo yuu sucun ñu ta tuchi ñu chi ñu cuan nu tyañuhu. <sup>43</sup>Tatu ndahun sanacavá

chuun nu cuatyí, vaha taxin ca cahnya. Vatyí vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhú cha ma ndahva ca maa. <sup>44</sup>Ta yucuan ña chihí tindacu chachí chi ñu, ta ñuhú ña ndahva maa ni noo chaha. <sup>45</sup>Ta tatu chahun ta sanacavá chuun nu cuatyí, vaha taxin ca cahnya. Vatyí vaha ca cuhun nu coun chihin Nyoo chihin cha luu chahun ta ñima ca chihin cha ninduvi chahun ta tuchi Nyoo chuun anyaya. Vatyí yucuan ma ndahva ca maa ñuhú. <sup>46</sup>Ta ña chihí tindacu chachí chi ñu, ta ñuhú ni noo chaha ña ndahva. <sup>47</sup>Ta tatu noo chiti nuu sanacavá chuun nu cuatyí, vaha taxin ca tava. Vatyí vaha ca cha quihvun nu nyacá ñaha Nyoo chihin noo chiti nuu ta ñima ca chihin ninduvi chiti nuun ta tuchi Nyoo chuun anyaya. <sup>48</sup>Vatyí yucuan ña chihí tindacu chachí chi ñu, ta ni noo chaha ña ndahva ñuhú.

<sup>49</sup>Soco tandihi ñu nyicon chii, tari cha cayú ñu chihin ñuhú tatu nyehe ñu tindoho cha cuende, vatyí chihin cuan cua sanduvaha Nyoo chi ñu, tari nduvaha nyayu chihin ñii. <sup>50</sup>Ñii vaha xaan. Soco tatu ndihi cha uhva, ýyoso caa cuví cotyiño yo inga chaha? Tyicuan caa tucu nyoho, ma sandihi ndo cha coo tuhun Nyoo añima ndo cha cuví tari ñii vaha. Tyicuan caa ta coo taxi ri ndo chihin tahan ndo.

**Nu sañahá ra Jesús tyi ña vaha sandoo rayii chi ñasihi ra**

(Mt. 19.1-12; Lc. 16.18)

**10** Quita ra Jesús Capernaum ta cuahan ra ityi Judea nya

inga chiyo yutya Jordán. Yucuan candu iin ri ñáyivi inga chaha nu nyaá ra, ta quichaha sañaha tucu ra chi ñu tari tuhvá maa ra. <sup>2</sup>Tyicuan ta suhva ra fariseo catuhva ra nu nyaá ra Jesús, vatyí nducu ra cuhva tyaa ra cuatyí siqui ra. Ta candaca tuhun ra chi ra tatu vaha cha sandoo noo rayii chi ñasihi ra. <sup>3</sup>Tyicuan ta nacahan ra Jesús ta catyí ra:

—¿Ñáá cha catyí ra Moisés tyi sacuví ndo?

<sup>4</sup>Ta canacahan ra ta cacatyí ra:

—Ra Moisés chaha ra cha cuví cahnya noo ra tutu cha tandaha ra tyicuan ta cuvi sandoo ra chi ñasihi ra —catyí ra chi ra.

<sup>5</sup>Tyicuan ta catyí ra Jesús chi ra:

—Catyí ra Moisés cha sacuvi ndo tyicuan caa soco cha cuenda cha ndava añima ndo. <sup>6</sup>Soco quivi xihna ri, quivi savaha Nyoo tandihi maa, savaha ra rayii ta ñaha sihi.

<sup>7</sup>“Yucuan cuenda sandoó rayii chi sutu ra ta chi sihi ra vatyí ndu iin ri ra chihin ñasihi ra. <sup>8</sup>Ta chichi cha ninduvi tahan ñu cucuvi ñu tari cha noo ri ñáyivi.” Yucuan chaha ñima ca uvi tahan cuví ñu, soco cha nanduvi ñu noo ri ñáyivi.

<sup>9</sup>Yucuan chaha, ña tahan chi cha sasiin ñáyivi cha sandu iin ri Nyoo —catyí ra Jesús chi ra.

<sup>10</sup>Yaha cuan ta nacha coyo ra nya vehe, ta quichaha ndaca tuhun ra cachicá noo chihin ra inga chaha siqui tuhun cuan. <sup>11</sup>Ta catyí ra Jesús chi ra:

—Ra cha sandoó ñasihi ta tandaha ra chihin inga ñu, chicoó cuatyí ra vatyí ña vaha sacuvi ra chihin ñasihi ra, ñaha cha xihna ri cuan.



<sup>12</sup>Ta tyicuan caa tucu ñusihí. Tatu sandoó ñu chí yíi ñu ta tandaha ñu chihin inga ra suri chicoq tucu cuatyí ñu —catyí ra Jesús.

**Nu nasoco ra Jesús chí ra cuatyaa**

(Mt. 19.13-15; Lc. 18.15-17)

<sup>13</sup>Tyicuan ta quichí nyaca ñu suhva ra cuatyaa chí ra Jesús tacuhva natyiso ra ndaha ra siqui ndotyín. Soco ra cachicá noo chihin ra ña chahá ca ra cha quichí nyaca ñu chí ndotyín. <sup>14</sup>Soco cuhva cha nanyehé ra Jesús, cuxaan ra. Ta catyí ra chí ra:

—Saña ndo. Na quichi nyaca ñu chí ra cuatyaa nu nyaí. Ta ma casi ndo. Vatyí ñu nyacá ñaha Nyoo añima, cuví ñu chinó iñi chí Nyoo tari chinó iñi ra cuatyaa ihya.

<sup>15</sup>Cha ndicha catyí chí ndo vatyí tatu ma nacuhva cuenda ndo chí ndo chí Nyoo tari noo ra cuatyaa chihin sutu ndotyín, ma cuví quihví ndo nu nyacá ñaha Nyoo —catyí ra Jesús chí ra.

<sup>16</sup>Ta quehén ra chí noo noo ndotyín ta tyihí sucun ndaha ra. Ta tyiso ra ndaha ra siqui ndotyín, ta chicān tahví ra chaha ndotyín.

**Nu ndatuhún minoo ra tyivaa tyayii chihin ra Jesús**

(Mt. 19.16-30; Lc. 18.18-30)

<sup>17</sup>Yahā cuan ta cuahan ra Jesús. Ta chinō vavaha noo ra cuan chata ra ta chicuñi chiti ra nuu ra, ta ndacā tuhun ra chí ra, ta catyí ra:

—Maestro, ra vaha cuvún. ¿Yoso caa sacuvi ta ñihi ñayiví cha ma naa ca maa coi? —catyí ra chí ra Jesús.

<sup>18</sup>Ta catyí ra Jesús chí ra:

—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyún tyi vahi, nacotón tyi Nyoo cuví.) <sup>19</sup>Yoho cha chitón cha catyí Nyoo cha sacuvi yo: “Ma coun chihin inga ñusihí tatu ñima ñasihun cuví. Ma cahñun. Ma suhun. Ma cahun cuendu siqui ni noo ñu. Ma sandavi ñahun. Sahun ñáyiví chí sutun ta chí síhun” —catyí ra Jesús chí ra.

<sup>20</sup>Ta nacahān ra cuan ta catyí ra: —Maestro, tandihí ihya cha sacuví nyata luhli —catyí ra.

<sup>21</sup>Tyicuan ta cusii cuñí ra Jesús nanyehé ra chí ra. Ta catyí ra chí ra:

—Cumañi noo ri ca cha cumañi chuun. Cuahān ta xicon tandihí cha iyó chuun ta cūhvon chí ñu ndahví. Tyicuan ta coo cha tyayiun nya andiví. Yaha cuan ta quichun cunyicon chii vasi nyehún tindoho —catyí ra Jesús chí ra.

<sup>22</sup>Soco cha chíñi ra tuhun cahān ra Jesús tyehe caa, nducuihya iñi ra, ta cuihya xaan cuanuhu ra vatyí tyayii xaan ra.

<sup>23</sup>Tyicuan ta nanyehé ra Jesús nicachico chata ra, ta catyí ra chí ra cachicá noo chihin ra:

—iñana cha yíi ta cuví nacuhva cuenda ñu tyayii chí ñu na cunyaca ñaha Nyoo chí ñu! —catyí ra chí ra.

<sup>24</sup>Iyo cacuñí ra cachicá noo chihin ra tuhun cahān ra. Soco catyí ra Jesús chí ra inga chaha:

—Sehi, ñu cha tyaa xaan xiñi cha tyayii, iyii xaan quihví ñu nu nyacá ñaha Nyoo! <sup>25</sup>Tañi tyehe yaha noo camellu xiu noo yiquí ticu, ta ñima ca cha cuhva noo ñu tyayii cunyacá ñaha Nyoo chí ñu —catyí ra Jesús.

<sup>26</sup>Cha cachiñi ra tuhun ihya, iyo xaan cacuñi ra, ta candaca tuhun ra chi ra tahan ra, ta catyí ra:

—Tu tyicuan caa, ¿yóó cha cuví cacu añima? —catyí ra.

<sup>27</sup>Nanyehe ra Jesús chi ra ta catyí ra chi ra:

—Ñáyivi ña cuví sacuvi ñu ihya. Soco Nyoo cuví chi ra. Vatyí cha cuenda Nyoo ñahri cha yí sacuvi ra.

<sup>28</sup>Tyicuan ta catyí ra Pedro chi ra:

—Sutu Mañi yuhu, nyuhu sandoo ndi tandihi cha iyó chi ndi, ta vityin nyicón ndi chuun.

<sup>29</sup>Nacahan ra Jesús ta catyí ra:

—Cha ndicha catyí chi ndo vatyí tandihi ñu sandoo vehe, o yañi, o cuhva, o sutu, o sihi, o ñasihí, o sehe, o ñuhú, cha cuenda yuhu ta cha cuenda cha sacoto ñu chi ñáyivi tyi cuñi Nyoo sacacu ra chi ñu, <sup>30</sup>cuañihi ñu ciento chaha siqui cha sandoo ñu ihya ñuhu ñayivi. Cuañihi ñu vehe ta yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehe ñáyivi tindoho chi ñu. Soco inga ñayivi cha vachi, cuñihi ñu ñayivi cha ma naa ca maa. <sup>31</sup>Soco cuaha xaan ñu cha cuví nuu vityin, ñu nu ndihi cucuvi ñu. Ta cuaha xaan ñu cuví ñu nu ndihi vityin, ican ñu cucuvi nuu —catyí ra Jesús.

**Nu cahán ra Jesús inga chaha tyi cucúvi ra**

(Mt. 20.17-19; Lc. 18.31-34)

<sup>32</sup>Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chi ra. Ta maa ñu iyo cuñi ñu ta chihin cha yuhví ñu cuahan coyo ñu chata ra.

Tyicuan ta cana siñ ra chi ndi uchi uvi ra cachicá noo chihin ra. Ta quichaha catyí ra cha cucuvi chi ra.

<sup>33</sup>Ta catyí ra:

—Tari cuhva nyehé ndo vityin, cua ndaa yo ityi cuahan ñuu Jerusalén nu cucuhva cuenda ñu chi yuhu Rayi cha quichi nya gloria chi ra cuví nuu chi tata sutu, ta chi ra sacuahá cuenda ley vehe ñuhu. Ta cucatyí ra tyi cucúvi ta cucuhva cuenda ra chii chi ra inga ñuu. <sup>34</sup>Ta cucuacu nyaa ra chii, cucañi ra chii, cutyicu si ra chii. Ta cucahñi ra chii. Soco cha cu uñi quivi cunandote cha yaha cúvi —catyí ra Jesús.

**Nu cachican ra Jacobo ta ra Juan noo tumañi iñi chi ra Jesús**

(Mt. 20.20-28)

<sup>35</sup>Tyicuan ta ra Jacobo ta ra Juan, ra cacuví sehe ra Zebedeo, catuhva ra nu nyaá ra Jesús, ta catyí ra chi ra:

—Maestro, cuñi ndi cha sahun noo tumañi iñi chi ndi —catyí ra.

<sup>36</sup>Ta ndaca tuhun ra Jesús chi ra:

—¿Ñáá cha cuñi ndo cha sacuvi cha cuenda ndo?

<sup>37</sup>Ta canacahan ra ta catyí ra:

—Cuhva cha cunyaa ndi chuhun nu nyacá ñahun, noo ndi chiyo vahun, ta inga ndi chiyo satyun —catyí ra chi ra Jesús.

<sup>38</sup>Tyicuan ta catyí ra Jesús chi ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cuanyehe yuhu? ¿Atu cuví cuhun ndo tuhun chihi tari cuhun yuhu? —catyí ra chi ra.

<sup>39</sup>Ta canacahan ra:

—Cuví chi ndi.

Ta ra Jesús catyí ra:

—Cha ndicha vatyí cunyehe ndo tindoho ta cahun ndo tuhun chihí tari cahun yuhu. <sup>40</sup>Soco tuhun cha cunyaa ndo chiyo vahi ta chiyo satyín, ñima yuhu tahán chi cuhve chi ndo, soco maa Nyoo cucatyí yóó cha cuñihi nyatu cuan —catyí ra Jesús chi ra.

<sup>41</sup>Cha cachiñi uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan. <sup>42</sup>Soco cana ra Jesús chi ra ta catyí ra chi ra:

—Chitó nyoho vatyí ra canyacá ñaha chi ñáyivi siqui ñuhu ñayivi, ñihi xaan yosó ra siqui ñu. <sup>43</sup>Soco ñima tyicuan caa tahán chi sacuvi nyoho. Vatyí ra cuñí cucahnu ca, cuñí chi cuvi ra musu tandihi ca ndo. <sup>44</sup>Ta nya nyoho cha cuñí ndo cuví ndo nuu, cuñí chi cuvi ndo musu tandihi ca ñu. <sup>45</sup>Vatyí ni ri yuhu Rayi cha quichi nya gloria ta ña vachi vatyí sacuvi ñáyivi tyiño nuí. Soco vachi vatyí sacuvi tyiño nuu ndo. Ta vachi vatyí cuhve ñáyivi tari noo cha cutiyahvi ta cusacaqui cuaha ñáyivi —catyí ra Jesús.

**Nu sanduvahá ra Jesús chi ra  
Bartimeo ra cha cuaa**

(Mt. 20.29-34; Lc. 18.35-43)

<sup>46</sup>Tyicuan ta cachaa coyo ra ñuu Jericó. Ta cua yaha ri ra ñuu cuan. Ta cuhva cha quita ra Jesús ñuu cuan cuaha xaan ñáyivi cuahan chata ra, iin ri chihin ra cachicá noo chihin ra. Ta yucuan nyaá noo ra cuaa cha naí Bartimeo. Sehe ra Timeo cuví chi ra. Nyaá ra cuan yatyin ri yuhu ityi cuan, chicán

ra caridaa. <sup>47</sup>Ta cha chiñi ra cuaa cuan tyi cua yaha ra Jesús ra ñuu Nazaret, quichahá cana chaa ra, ta catyí ra:

—iYoho Jesús, ra vachi tata ra David, cundahvi cuñi chii! —catyí ra canachaá ra.

<sup>48</sup>Cuaha ñu chasi yuhu ra na cutaxin ra, soco maa ra ñihi ca cana chaa ra ta catyí ra:

—iYoho ra vachi tata ra David, cundahvi cuñi chii! —catyí ra.

<sup>49</sup>Tyicuan ta chicuñi ra Jesús ta catyí ra:

—Cana ndo chi ra.

Ta cacana ra chi ra cuaa cuan ta catyí ra chi ra:

—Sanií iñun. Ndücüita, vatyí caná ra chuun —cacatyí ra chi ra.

<sup>50</sup>Tyicuan ta tuchi ñihno ra sahma ndichi ra. Ta ndava ra noo ta tuhva ra nuu nyaá ra Jesús.

<sup>51</sup>Tyicuan ta quichahá ndaca tuhun ra Jesús chi ra:

—¿Ñáá cha cuñun cha sacuvi chuhun?

Ta nacahan ra cuaa cuan ta catyí ra:

—Maestro, cuñí cha sanduvahun chiti nuí —catyí ra.

<sup>52</sup>Ta catyí ra Jesús chi ra:

—Cuahan. Cha nduvahun vatyí chinó iñun chii.

Ta caa cuhva ri cuan cuví nanyehe ra cuaa cuan. Ta cuahan ra chata ra Jesús ityi cuahan ra.

**Nu quihvi ra Jesús ñuu Jerusalén**

(Mt. 21.1-11; Lc. 19.28-40; Jn. 12.12-19)

**11** Cachaa coyo ra yatyin ri ñuu Jerusalén, nu nyaá ñuu Betfagé ta ñuu Betania. Ta yucu yutun Olivo nyaá ityi nuu chiin ca.

Tyicuan ta catyí ra Jesús chi uvi ra chicá noo chihin ra:

<sup>2</sup>—Cuahan ndo chichi ñuu cha nyaá ityi nuu chiña. Ta nu cua chaa ndo cunañihi ndo noo burru chaa nuhñi ti, qiti ta quihí ca tyayu cuví ti. Ndachi ndo chi ti, ta quichi nyaca ndo chi ti. <sup>3</sup>Ta tatu yóo cha ndaca tuhun ñáa tuhun sacuví ndo tyicuan caa, catyi ndo chi ñu vatyi chiñuhú ti chi ra nyacá ñaha, ta numi ri cunanyaca ndo chi ti, catyi ndo chi ñu —catyí ra Jesús chi ra.

<sup>4</sup>Tyicuan ta cuahan coyo ra, ta canañihi ra burru cuan nuhñi ti ityi cahnu yatyi ri noo yuvehe, ta candachi ra chi ti. <sup>5</sup>Ta suhva ra canyicú cuan catyí ra chi ra:

—¿Ñáa cha nyacuvi ndo? ¿Ñáa tuhun cha ndachí ndo burru chiña? —catyí ra chi ra.

<sup>6</sup>Tyicuan ta canacahan ra tari cuhva cha catyi ra Jesús chi ra. Ta cachaha ra cuhun coyo ra. <sup>7</sup>Tyicuan ta caquehen ra burru cuan ta chinyaca ra chi ra Jesús. Ta catyiso ra sahma ra siqui ti, ta ndaa ra Jesús chi ti. <sup>8</sup>Ta cuaha ñu ndica ñu sahma ñu ityi cuahan ra, ta inga ñu chahnu ñu soco numa ta cachacun ñu.

<sup>9</sup>Tyicuan ta ñu cha cuahan ityi nuu ra ta ñu cha cuahan ityi chata, quichaha cana chaa ñu ta catyí ñu:

—¡Cahnu xaan cuví Nyoo! ¡Na sacahnu yo chi ra vachi cuenda Sutu yo Nyoo! <sup>10</sup>¡Sacahnu yo chi ra vachi nyacá ñaha tari chinyaca ñaha sutu chahnu yo ra David! ¡Cahnu xaan ca cuví ra nyaá andivi! —catyí ñu.

<sup>11</sup>Tyicuan ta quihvi ra Jesús chichi ñuu Jerusalén, ta cuahan

ra vehe ñuhu cahnu. Ta cha yaha nanyehe ra ityi cuan ityi ihya, ndaca chata ra ñuu Betania chihin ndi uchi uvi ra chicá noo chihin ra vatyi cha ñi.

**Nu soco ra Jesús chi yutun higo cha ñahri chiti ñi nuu tun**

(Mt. 21.18-19)

<sup>12</sup>Cha inga quivi quita coyo ra ñuu Betania cuan, ta cha ni ri ca cha cuahan ra chicá ityi ra chaa noo soco chi ra Jesús. <sup>13</sup>Ta nyasava ri nanyehe ra noo tu higo cha nyaá numa. Ta chahan ra chinyehe ra tatu ñi chiti nuu tun, soco maa maa ri numa ri ñi, vatyi ta chaa ca quivi quita chiti tun. <sup>14</sup>Tyicuan ta cuahan ra Jesús chihin tun, ta catyí ra chi tun tyehe caa:

—Ma coo ca chiti cachi ñayivi nuun —catyí ra chi tun.

Ta ra cachicá noo chihin ra cachiñi ra cha cahán ra.

**Nu tava ñehe ra Jesús chi ra caxicó chichi vehe ñuhu cahnu**

(Mt. 21.12-17; Lc. 19.45-48; Jn. 2.13-22)

<sup>15</sup>Yaha cuan ta nachaa coyo ra Jerusalén. Ta quihvi tucu ra Jesús chichi vehe ñuhu cahnu. Ta quichaha tava ñehe ra chi ra caxicó ta ra casatá yucuan. Sanduva ra mesa ñu canasamá xuhun chi ñayivi. Ta suri tyicuan caa sacuvi ra chihin tyayu ra caxicó paloma. <sup>16</sup>Ta ña chaha ca ra ca cuiso ñu ñáa cha cuiso ñu ityi chichi vehe ñuhu cuan. <sup>17</sup>Ta quichaha sañaha ra chi ñu, ta catyí ra:

—Nu tutu Nyoo catyí chi: “Vehi, vehe nu chicán tahvi tandihí ñayivi iyó siqui ñuhu ñayivi cuví”, catyí

Nyoo. ¡Soco nyoho nasahá ndo vehe nu nyicú ra suhu! —catyí ra Jesús.

<sup>18</sup>Ta ra cacuví nuu chi tata sutu ta ra casacuahá cuenda ley vehe ñuhu cachiñi ra cha cahán ra, ta quichaha canducu ra cuhva cha cacahni ra chi ra vatyí cayuhví ra chi ra tyi cha tandihi ñáyivi iyo cuñí ñu cha sañahá ra. <sup>19</sup>Soco cuhva cha cua cuaa ra Jesús quita ri ra ñuu cuan chihin ra cachicá noo chihin ra.

**Nu na ityi tu higo cha soco ra Jesús**

(Mt. 21.20-22)

<sup>20</sup>Cha ñaha ri cha inga quivi cuan, nayaha coyo ra nu nanyaá tu higo cuan. Ta cananyehé ra vatyí na ityi nyacua nya yoho tun. <sup>21</sup>Tyicuan ta nicohon iñi ra Pedro vatyí soco ra Jesús chi tun ta catyí ra chi ra Jesús:

—Maestro, nyehé tu higo cha soco, cha na ityi tun —catyí ra.

<sup>22</sup>Nacahan ra Jesús, ta catyí ra:

—Chino iñi ndo chi Nyoo. <sup>23</sup>Vatyí cha ndicha catyí chi ndo vatyí nya nyoho catyí ndo chi yucu ihya, “Na canyaha ta cuhun nu tyañuhu”, ta tatu ña chicá uvi iñi ndo, ta chinó iñi ndo, tuhun cahan ndo cua cuvi. <sup>24</sup>Yucuan chaha catyí chi ndo vatyí tandihi cha chicán tahvi ndo, ta tatu chinó iñi ndo tyi cha naquehen ndo, tyicuan caa cucuvi. <sup>25</sup>Ta tatu chicán tahvi ndo chi Nyoo ta cuxaán ndo chi inga ñu, saha ndo ticahnu iñi chi ñu, tacuhva vatyí Sutu ndo, ra nyaá andivi, saha tucu maa ra ticahnu iñi cuatyí ndo. <sup>26</sup>Soco tatu ña sahá ndo ticahnu iñi chi ñu, ni ri Sutu ndo, ra nyaá andivi, ma saha ra ticahnu iñi cuatyí maa ndo.

**Yóo cha chaha ityi chi ra Jesús vatyí sacuvi ra cha sacuví ra**

(Mt. 21.23-27; Lc. 20.1-8)

<sup>27</sup>Tyicuan ta nachaa coyo ra Jerusalén. Ta cha niri ca cha chicá noo ra Jesús chichi vehe ñuhu cahnu cuan, catuhva ra cacuví nuu chi tata sutu, ta ra sacuahá cuenda ley, ta ra cacuví mandoñi nu nyaá ra. <sup>28</sup>Ta candaca tuhun ra chi ra.

—¿Yóo cha tyaa tyiño chuun vatyí sacuvun tyehe caa? ¿Yóo cha chaha ityi chuun vatyí sacuvun? —cacatyí ra.

<sup>29-30</sup>Ta nacahan ra Jesús, ta catyí ra:

—Cua ndaca tuhun tucu yuhu noo tuhun chi ndo. ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, tyicuan ta cua catyí tucu yuhu chi ndo yóo cha tyatyíño ihya chii —catyí ra Jesús chi ra.

<sup>31</sup>Tyicuan ta quichaha cacuvi yuhu maa ra chihin tahan ra ta cacatyí ra:

—Tatu catyí yo tyi Nyoo tachí chi ra Juan, cucatyí ra chi yo: “Tu tyicuan caa, ¿ñáá tuhun ña chino iñi ndo chi ra?” <sup>32</sup>¿Ta yoso caa catyí yo tyi ñáyivi tachí chi ra? Ma cuvi —cacatyí ra, vatyí cayuhví ra chi ñáyivi, vatyí tandihi ñu cachinó iñi ñu vatyí cha ndicha cuenda Nyoo cahan ra Juan.

<sup>33</sup>Tyicuan ta quichaha cacatyí ra chi ra Jesús:

—Ña chitó ndi.

Tyicuan ta ra Jesús catyí ra chi ra:

—Ni yuhu ma catyí chi ndo yóo cha tyaa tyiño chii tyi sacuvi cha sacuví —catyí ra Jesús chi ra.

**Nu chaha ra Jesús noo cuhva yoso  
caa cucahñi ñu chi ra**

(Mt. 21.33-46; Lc. 20.9-19)

**12** Tyicuan ta chihin cuhva ihya quichaha cahan ra Jesús chihin ra, ta catyí ra chi ra: —Chiyo noo ra cha tachí ra yoho tichaha ndivi. Ta chasi ra chaha. Ta savaha ra noo nu cuhñi ra tichaha ndivi. Ta savaha ra noo vehe sucun tacuhva vatyí cuví saha ra cuenda tandihi.

Yaha cuan ta chaha noo ra ñuhú cuan chi suhva ra casahá tyiño. Ta cuahan ra inga ñuu. <sup>2</sup>Ta cha chaq quivi iyó chiti yoho cuan, chitoho ñuhú cuan tachí ra noo musu nu nyicú ra casahá tyiño cuan vatyí cacan ra suhva chiti cha tahán chi chi ra. <sup>3</sup>Soco catiñ ra chi ra. Ta cacañi ra chi ra. Ta canatachi ra chi ra chihin nu ndaha nu ndi ra. <sup>4</sup>Tyicuan ta chitoho ñuhú cuan tachí ra chi inga musu, soco chi ra ihya catuchi ra yuu chi ra, catahvi ra xiñi ra, ta cacahan uhvi ra chi ra. <sup>5</sup>Ta inga tucu musu tachí chitoho ñuhú cuan. Ta chi ra cuan cachahñi ra. Yaha cuan ta tachí ra cuaha ca ra. Soco cacañi ra chi suhva ra. Ta chi suhva ca ra cachahñi ra. <sup>6</sup>Ta ndoo noo ri ca ra cha cuví tachi chitoho ñuhú cuan. Ican cuví sehe ra cha cuñi xaan ra. Ta nu ndihi tachí ra chi sehe ra vatyí cuñi maa ra chicá xiñi ra: “Cucasaha ra ñáyivi chi sehi”, cuñi ra chicá xiñi ra. <sup>7</sup>Soco nu chaq sehe ra, ra casahá tyiño cuan catyí ra chi tahan ra: “Ican ra ihya cundoo chihin tandihi ihya. Na cahñi yo chi ra, ta ndoo maa yo chihin”,

catyí ra. <sup>8</sup>Ta tyicuan caa catiñ ra chi ra ta cachahñi ra chi ra. Tyicuan ta cachituchi ra coño ñuhu ra ityi chata chacu cuan —tyicuan caa cuhva cahan ra Jesús chihin ra cuan.

<sup>9</sup>Tyicuan ta ndaca tuhun ra Jesús chi ra ta catyí ra:

—¿Ñáá cha cusacuvi ra cuví chitoho ñuhú cuan? Cuquichi ra ta cucahñi ra chi ra casahá tyiño cuan. Ta cuhva ra ñuhú cuan chi inga ra.

<sup>10</sup>¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cacuñi ra casavaha vehe cotyiño ra, ican cuan cuví yuu cha niñi ca.

<sup>11</sup>Ican ihya cuví cha sacuvi Sutu yo Nyoo.

Ta tyaqui xaan tuhun cha cuenda chi yo, catyí chi nu tutu Nyoo —catyí ra Jesús chi ra cacuví nuu chi tata sutu cuan.

<sup>12</sup>Tyicuan ta canducu ra cuhva cha tyihi ra chi ra Jesús vehe caa vatyí cachitó ra vatyí cahán ra cuhva ihya soco cha cuenda maa ra. Soco vatyí cayuhví ra chi ñáyivi, casandoo ra chi ra, ta cuahan coyo ra.

**Nu ndaca tuhun ra chi ra Jesús cha  
cuenda xuhun cha tavá gobiernu ñuu  
Roma**

(Mt. 22.15-22; Lc. 20.20-26)

<sup>13</sup>Tyicuan ta catachi ra suhva ra cuenda ra Herodes ta suhva ra fariseo nu nyaá ra Jesús vatyí casacahan ra chi ra ta coo cuatyí catyaa ra siqui ra. <sup>14</sup>Chaq coyo ra ihya ta quichaha catyí ra chi ra Jesús:

—Maestro, chitó ndi vatyí cahún cha ndicha, ta ña quichahún cha cahán ñáyivi, ta ña natiín cuendon cuhva caa ri ñu. Ta ndicha sañahún ityi Nyoo. Yucuan chaha cuñí ndi coto ndi, ¿atu vaha cha tyiyahvi yo cha chicán gobiernu ñuu Roma chi yo, o ña vaha? ¿Atu tahán chi cha tyiyahvi yo, o ña tahán chi? —cacatyí ra chi ra Jesús.

<sup>15</sup>Soco ra Jesús chitó ra vatyí ñima cha vaha chicá xiñi ra, ta catyí ra chi ra:

—¿Ñáá tuhun cha cuñí ndo sandavi ñaha ndo chii? Nyaca ndo noo xuhun chii, na nyehi —catyí ra.

<sup>16</sup>Caquichí nyaca ra chi ra. Ta cuhva cha nanyehé ra ta ndaca tuhun ra chi ra, ta catyí ra:

—¿Yóó chi nuu ihya, ta yóó chi sivi nyaá ihya? —catyí ra chi ra.

Ta canacahan ra ta cacatyí ra:

—Chi gobiernu.

<sup>17</sup>Tyicuan ta catyí ra Jesús chi ra:

—Cuhva ndo chi gobiernu cha tahán chi chi ra. Ta cuhva tucu ndo chi Nyoo cha tahán chi Nyoo —catyí ra Jesús chi ra.

Ta iyo cacuñí ra tuhun cha nacahan ra.

**Nu canducú tuhun ra saduceo siqui tuhun cha nandotó ndiyi**

(Mt. 22.23-33; Lc. 20.27-40)

<sup>18</sup>Tyicuan ta cuahan coyo suhva ra saduceo nu nyaá ra Jesús. Ican ra saduceo ihya catyí ra vatyí ña nandotó ndiyi. Yucuan chaha cacahan ra tyehe caa ta catyí ra chi ra Jesús:

<sup>19</sup>—Maestro, tyaa ra Moisés tuhun yoso caa tahán chi sacuvi yo tatu noo rayii ta chihí ra ta

ndoq ñasihi ra soco ña chicoo sehe ra chihin ña. Catyí ra vatyí tahán chi tandaha yañi ra chihin ñaha cha chihí yii cuan, tacuhva vatyí coo sehe ña cha cuenda ndi yañi ra. <sup>20</sup>Noo chaha chiyó ucha tahan ra chihin yañi ra. Ra cha xihna ri tandaha ra chihin noo ña, ta yori sehe ra chicoo. <sup>21</sup>Ta ra cu uvi tandaha ra chihin ñaha cha ndoo cuan. Ta suri chihí ra. Ta suri yori sehe ra chicoo. Ta tyicuan caa tucu cuví chihin ra cu uñi cuan. <sup>22</sup>Ta tyicuan caa ndi ucha tahan ra tandaha chihin ña. Ta ni noo ra ña cachiyo sehe ra chihin ña. Ta nu ndihí tuhun, chihí ndihí maa ña. <sup>23</sup>Ta vityin, quivi cunandoto ñáyivi, ¿nya ra cucuvi yii ña? Vatyí ndi ucha tahan ra cuan chiyó chihin ña —cacatyí ra chi ra Jesús.

<sup>24</sup>Tyicuan ta nacahan ra Jesús ta catyí ra chi ra:

—Nyoho cahán tondo ri maa ndo, vatyí ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo. <sup>25</sup>Vatyí quivi cunandoto ndiyi, ni ma tandaha ñu ta ni ma cuhva ñu sehe ñu tandaha, vatyí tari ángel cha nyaá andivi tyicuan caa cucuvi ñu.

<sup>26</sup>Ta tuhun cha nandotó ndiyi cuan, ¿atu ta sacuha ca ndo nu libru ra Moisés yoso caa cahán Nyoo chihin ra nu cayú taca iñu cuan? Ta tyehe caa catyí ra chi ra: “Yuhucuví Nyoo cuenda ra Abraham, ta cuenda ra Isaac, ta cuenda ra Jacob”, catyí Nyoo chi ra Moisés. <sup>27</sup>Ta cha catyí Nyoo tyicuan caa cuñí chi catyí vatyí vasi cha naha cachihí ra, soco canyitó añima ra vatyí Nyoo ñima Nyoo cuenda ñu

ndiyi cuví ra, soco Nyoo cuenda ñu nyitó cuvi ra. Yucuan chaha catyí vatyí nyoho cahán tondo ri ndo — catyí ra Jesús chi ra.

**Ley cha niñi ca cha chaha Nyoo**

(Mt. 22.34-40)

<sup>28</sup>Chaa tucu noo ra sacuahá cuenda ley vehe ñuhu cuan, ta chiñi ra cacuví yuhu ra. Ta vatyí chitó ra vatyí ra Jesús vaha nacahan ra nu cacahan ra yucuan, ta ndaca tuhun ra chi ra ta catyí ra:

—Chichi cha tandihi ley, ¿nya cha niñi ca sacuvi yo? —catyí ra.

<sup>29</sup>Ta nacahan ra Jesús ta catyí ra:

—Cha xihna ca sacuví yo cha nuu tandihi, ican cuví ihya: “Cuñi ndo ñu Israel. Sutu yo Nyoo, noo ri maa ra iyó. <sup>30</sup>Cuñun chi Sutu yo Nyoo chihin cha ñi iñun ta chihin cha tandihi añimon, ta chihin cha tandihi cha chiñi tuñi xiñun, ta chihin cha tandihi tunyee iñun.” Ican ihya cuví cha xihna ca cha tahán chi sacuvi yo. <sup>31</sup>Ta cha cu uvi catyí chi: “Cuñun chi tahun tari cuñún chi maun.” Ñahri ca tuhun cha niñi ca ican saha nduvi tahan ihya —catyí ra Jesús.

<sup>32</sup>Tyicuan ta ra sacuahá cuenda ley cuan catyí ra chi ra:

—Vaha xaan nacahan, Maestro. Ndicha cha catyún vatyí noo ri Nyoo iyó, ta yori ca Nyoo iyó, noo tuhun ri maa ra. <sup>33</sup>Ta cha cuñí yo chi Nyoo chihin cha ñi iñi yo ta chihin cha tandihi cha chiñi tuñi xiñi yo, ta chihin cha tandihi añima yo, ta chihin cha tandihi fuerza yo, ta cuñi yo chi tahan yo tari cha cuñí yo chi maa yo, vale ca cuan ta ñima ca tandihi quití cha

chahá yo chi Nyoo cha chahñi yo ta chahmi yo —catyí ra sacuaha cuenda ley cuan chi ra Jesús.

<sup>34</sup>Nyehe ra Jesús vatyí vaha nacahan ra chihin cha cachi xiñi ra. Ta catyí ra chi ra:

—Chiin ri ca cuñí chi ta ñihún cuhva yoso caa nacuhvon añimon chi Nyoo na cunyaca ñaha ra — catyí ra Jesús chi ra.

Ta ni noo ca ñu ña cañá ca iñi ñu candaca tuhun ñu ñáá cha ndaca tuhun ñu chi ra Jesús.

**¿Yóo chi tata vachi ra Cristo?**

(Mt. 22.41-46; Lc. 20.41-44)

<sup>35</sup>Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyí ra Cristo vachi ra tata ra David? <sup>36</sup>Vatyí suri maa ra David chotyíño Tatyí li chi ra ta catyí ra:

Cahan Suti Nyoo chihin Suti ra Cristo, ta catyí ra:

“Cunyaa chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

<sup>37</sup>¿Yoso caa cha ra vachi tata ra David cuví chi ra Cristo, ta suri maa ra David catyí ra vatyí ra Cristo cuví Sutu ra? —catyí ra Jesús.

Ta cuaha xaan ñáyivi nyicú yucuan sii xaan cacuñí ñu chiñí ñu tuhun cahán ra.

**Nu catyí ra Jesús vatyí iyó cuatyí ra casacuahá cuenda ley vehe ñuhu**

(Mt. 23.1-36; Lc. 11.37-54; 20.45-47)

<sup>38</sup>Nu sañahá ra Jesús ta catyí ra tyehe caa:



—Saha ndo cuenda chi ndo chihin ra casacuahá cuenda ley vehe ñuhu, vatyí tahán iñi ra cacuihno ra sahna nañi ta chicá noo ra nyahvi tacuhva saha ndo ñáyivi chi ra, ta cuhva ndo nocumi chi ra. <sup>39</sup>Maa ra cananducú ra nu vaha ca cunyicu ra chichi vehe ñuhu. Ta nu vaha ca cacuñí ra cachi ra nyayu nu iyó vico. <sup>40</sup>Ta ican ra catinyaá vehe ñu chihí yíi, vatyí ña cuví tyiyahvi ñu ñáá xuhun tava ra siqui ñu. Ta cuñí ra sacuvaha ra chi ra nuu ñáyivi. Yucuan chaha naha chicán tahvi ra nu tuvi. Maa ra cuví cha cutachi tuñi ca Nyoo chii —catyí ra Jesús.

### **Noo cha chahá noo ñaha chihí yíi**

(Lc. 21.1-4)

<sup>41</sup>Noo chaha nyaá ra Jesús chichi vehe ñuhu cahnu yatyin ri nu nyaá chatun nu cumí ñu xuhun cha chaha ñáyivi chi Nyoo. Ta nyehe ra yoso caa tyihí ñáyivi xuhun yucuan. Ta cuaha ñu tyayíi chahá ñu cuaha xaan xuhun. <sup>42</sup>Tyicuan ta chaq tucu noo ñaha ndahvi chihí yíi, ta tyihí ña uvi tahan xuhun cuatyí cha caha xaan nyaá. <sup>43</sup>Tyicuan ta cana ra Jesús chi ra cachicá noo chihin ra, ta catyí ra chi ra:

—Cha ndicha catyí chi ndo vatyí ñaha ndahvi chihí yíi ihya, cuaha ca chaha ña ta ñima ca inga ñu catyihí xuhun chiña. <sup>44</sup>Vatyí tandihí ñu cachaha ñu cha ndoo ri ca chi ñu. Soco maa ña chihin cha ndahvi ña chaha ña tandihí cha cumí ña —catyí ra Jesús.

### **Nu catyí ra Jesús vatyí cutani vehe ñuhu cahnu**

(Mt. 24.1-2; Lc. 21.5-6)

**13** Cuhva cha cua quita ra Jesús chichi vehe ñuhu

cahnu cuan, noo ra chicá noo chihin ra catyí ra chi ra:

—iMaestro, nyehe ñana cha tyaqui yuu yihí vehe ihya! iÑana cha nahnu vehe ihya! —catyí ra chi ra Jesús.

<sup>2</sup>Soco nacahan ra Jesús, ta catyí ra chi ra:

—¿Atu nyehún vehe nahnu ihya? Soco catyí chuun vatyí ma ndoo ni noo yuu coso siqui tahan, vatyí tandihí cutani —catyí ra Jesús.

### **Seña cha cucuvi cha ni cumañi ca naa ñayivi**

(Mt. 24.3-28; Lc. 21.7-24; 17.22-24)

<sup>3</sup>Tyicuan ta cuahan coyo ra nya yucu yutun Olivo cha nyaá inga chiyo xahva ityi nuu vehe ñuhu cahnu. Ta cuhva cha nyaá ra Jesús yucuan, ra Pedro, ra Jacobo, ra Juan, ta ra Andrés candaca tuhun xehe ra chi ra:

<sup>4</sup>—Cuñí ndi cha catyun chi ndi ama cucuvi tandihí tuhun cha cahun tuhun. ¿Ñáá seña cucuvi tatu cha cua cuvi? —cacatyí ra.

<sup>5</sup>Nacahan ra Jesús ta catyí ra:

—Saha ndo cuenda chi ndo tacuhva yori sandavi ñaha chi ndo.

<sup>6</sup>Vatyí cuaha xaan ra cuquichi coyo ra, ta cucotyíño ra sivi ta cucatyí ra: “Yuhu cuví ra Cristo.” Ta cusandavi ñaha ra chi cuaha xaan ñáyivi.

<sup>7</sup>Soco tatu chiñí ndo tuhun tyi iyó cuatyí ta cañí tahan ñáyivi, ma nayuhvi ndo. Vatyí tyicuan caa tahán chi cucuvi, soco ta chaa ca quivi cunaa ñayivi. <sup>8</sup>Vatyí noo ñuu cucañi tahan chi chihin inga ñuu, ta ñáyivi cuenda noo gobiernu cucañi tahan ñu chihin ñáyivi

cuenda inga gobiernu. Ta cucoo cha taan nahnu cuaha ri ityi. Ta cucoo tama. Ta cunaquiqui ñáyivi. Ta tyehe caa cua quichaha cha nyehe ñáyivi tindoho. <sup>9</sup>Soco saha ndo cuenda chi ndo. Vatyí cucuhva cuenda ñu chi ndo chi ra cacuví tyiño. Ta cucañi ñu chi ndo chichi vehe ñuhu. Cucuhva cuenda ñu chi ndo nuu gobernador ta nuu rey cha cuenda yuhu. Ta tyicuan caa cuví cahan ndo tuhin nuu ra. <sup>10</sup>Vatyí cha ni cumañi ca naa ñayivi, cuñí chi cucutya tuhun Nyoo yoso caa sacacú ra añima ñáyivi tandihí ñuu. <sup>11</sup>Ta cuhva cha cunyaca ñu chi ndo nuu ra cacuví tyiño, ma caca xiñi ndo ñáá tuhun cucahan ndo, ni ma ndichí xiñi ndo. Cahan ndo cha catyi Nyoo chi ndo cha cahan ndo cuhva cuan. Vatyí ñima nyoho cucahan, soco maa Tatyí li Nyoo. <sup>12</sup>Yihí ra cunacuhva cuenda ra nyacua nya chi yañi maa maa ra. Ta sacuvi ra na cacahñi ñu chi ra. Ta yihí ñáyivi cunacuhva cuenda ñu chi sehe ñu. Ta yihí ñu cunaquiqui ñu siqui sutu ñu ta sihi ñu. Ta cunacuhva cuenda ñu chi ñu na cahñi ra chi ñu. <sup>13</sup>Tandihí ñáyivi cutasi cuñi nyehe ñu chi ndo cha cuenda yuhu. Soco tatu cunyeé iñi ndo nyacua nya nu ndihí, cucacu ndo.

<sup>14</sup>Ra Daniel, ra profeta Nyoo ta cha naha, tyaa ra yoso caa cuahan tuhun noo cha cusacaquini nu ii xaan. Ta cusativi chi tandihí. Tatu nyehé ndo nanyaá yucuan nu ña tahán chi cuinanyaa, (nyoho cha sacuahá ndo ihya na cutuñi iñi ndo) cuñí chi cha cono tandihí ñu iyó Judea nya ityi yucu. <sup>15</sup>Ta ñu

ñohó xiñi vehe quivi cuan, noo ñu, soco ma quihvi ñu chichi vehe ñu tava ñu ñáá cha tava ñu. <sup>16</sup>Ta ñu ñohó nu chiqui, ma cunuhu ñu nya vehe ñu cha cunaquehen ñu sahma ñu. <sup>17</sup>iNdahvi ñusihí cha cañohó sehe quivi cuan! iNdahvi tucu cuvi ñusihí cha chaxín sehe quivi cuan! <sup>18</sup>Caacan ndo chi Nyoo tacuhva cha ma tahan chi caca cono ndo quivi vichin. <sup>19</sup>Vatyí quivi tindoho cucuvi. Ta ni noo chaha ta cuvi ca tyicuan caa nyata quivi chino ñuhu ñayivi nyacua nya vityin. Ta ni ma coo ca tindoho tahán ihya nu cuahan ca chi. <sup>20</sup>Tyehe ta ma sanducuiti Sutu Mañi yo tyembu cuan, yori maa cucacu. Soco cusanducuiti ra cha cuenda cha cuñí ra chi ñu cuenda ra, ñu cha nacachi maa ra.

<sup>21</sup>Tatu yóo cha catyí chi ndo: “Nyehe ndo, ma ra Cristo ihya” o “Nyehe, ma ra nyaá yucuan”, ma chino iñi ndo. <sup>22</sup>Vatyí cuquichi ra casandaví ñaha, cucatyí ra tyi ra Cristo cuví ra. Ta yihí ra cucatyí ra vatyí profeta Nyoo cacuví ra. Ta cucasavaha ra seña, milagru, vatyí canducú ra cuhva sandaví ñaha ra nyacua nya chi ñu cha nacachi maa Nyoo tatu cuví chi ra. <sup>23</sup>Soco saha vaha ndo cuenda vatyí yuhu cha sacote chi ndo cha ni cumañi ca cuvi tyicuan caa —catyí ra Jesús.

#### **Nu sacoto ra Jesús yoso caa cuquichi tucu ra inga chaha**

(Mt. 24.29-35, 42-44; Lc. 21.25-36)

<sup>24</sup>Ta catyí tucu ra Jesús tyehe caa: —Soco quivi cha yaha tindoho, cunduñaa ñanyii. Ma cundichin ca yoo. <sup>25</sup>Tiño cunacoyo andivi. Ta nyacua nya tandihí cha iyó andivi

ta cunacanda. <sup>26</sup>Tyicuan ta cunyehe ndo chi yuhu Rayii cha quichi nya gloria inga chaha, vachi nu vico chihin cha ndicha ñuhu Nyoo, ta chihin cha cahnu cuví ra. <sup>27</sup>Tyicuan ta cutachi chi ángel ta cusandu iin ri chi ñu nacachi ñicahnu siqui ñuhu ñayivi, nyacua nya nu ndihi ñuhu ñayivi ta nyacua nya nu ndihi andivi.

<sup>28</sup>Cutuñi iñi ndo cuhva tu higo ihya: Tatu nduyutya soco tun ta caña numa tun cha chitó ndo vatyí cha cuñí chaa quivi coo chiti, cha vachi vico savi. <sup>29</sup>Ta suri tyicuan caa tatu cha nyehe ndo tuhun ihya, coto ndo tyi cha nyaña yatin quivi quichi tiqui. Cha nyañai yuvehe cuví cuan. <sup>30</sup>Cha ndicha catyí chi ndo vatyí tandihi ihya cucuvi cha ni ri ca cha iyó ñáyivi. <sup>31</sup>Tyicuan ta cunaa andivi ta ñuhu ñayivi cha iyó cha vityin. Soco tuhun cahín tyicuan ri cucuvi tari cuhva catyí.

<sup>32</sup>Soco yori chitó ñáá quivi ta ñáá cuhva cucuvi tandihi ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

<sup>33</sup>Yucuan chaha conyito vaha ndo, ta saha ndo cuenda ta caçan tahvi ndo, vatyí ña chitó ndo ñáá quivi cuchaa cuhva. <sup>34</sup>Tari noo ra cha cua cuhun nu cañi. Ta cha ni cumañi ca cuhun ra, chaha cuenda ra vehe ra chi musu ra. Ta chaha tyiño chi noo noo ra. Ta tachí ra chi ra sahá cumi yuvehe cuan na saha ra cuenda. <sup>35</sup>Yucuan chaha nyoho conyito ndo vatyí ña chitó ndo ñáá cuhva cuquichi ra cha cuví tari chitoho vehe cuan, an cha ni

cua cuaa, an ñuu, an cuhva cha chacú chaa loho, an cha ñaha ri.

<sup>36</sup>Conyito ndo coto sana iñi ndo ta quichi ra, ta ñañihi ra chi ndo quixí ndo. <sup>37</sup>Cha catyí chi nyoho, catyí tiqui chi tandihi ñáyivi ñandihi. Na conyito ñu.

### Nu canducu ra cuhva catiin ra chi ra Jesús

(Mt. 26.1-5; Lc. 22.1-2; Jn. 11.45-53)

**14** Uvi ca quivi cumañi ta cua tahan chi vico cha ñañí pascua ta vico cha tuhva ñu chachí ñu pan cha ñahri yuchan iya yihí. Ta ra cacuví nuu chi tata sutu ta ra casacuahá cuenda ley vehe ñuhu canducú ra cuhva catiin xehe ra chi ra Jesús ta cacahñi ra chi ra. <sup>2</sup>Soco cacatyí ra chi ra tahan ra: —Ma tiin yo chi ra cha chichi vico vityin coto naquiqui ñáyivi — cacatyí ra.

### Nu choso noo ñaha sihi ndutya vixi chahán chi ra Jesús

(Mt. 26.6-13; Jn. 12.1-8)

<sup>3</sup>Ñohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra mesa, cha noo ñaha sihi ndaha ña noo yutyí cha chingo chihin noo yuu cha ñañí alabastro. Tyitu yihí chihin ndutya vixi chahán cha ñañí nardo. Ta yahvi vavaha nyaá. Ta tahvi ña yutyí cuan ta choso ña ndutya vixi chahán cuan xiñi ra Jesús. <sup>4</sup>Soco suhva ra canyicú yucuan cacuxaan ra ta cacatyí ra chi tahan ra:

—¿Ñáá tuhun sativi ña ndutya vixi chahán cuan? <sup>5</sup>Tyehe ta quiyahvi cuan, cuenda mil cuñihi

yo chihin chi, ta tyinyee chi chi ñu ndahvi —catyí ra.

Ta cahan ra chi ña.

<sup>6</sup>Soco ra Jesús catyí ra:

—iSaña ndo chi ña! ¿Ñáá tuhun cha sayangá ndo chi ña? Cha choso ña chii tyehé caa, cha vaha cuví. <sup>7</sup>Vatyí ñu ndahvi tyicuan ri cua cunyaa ñu chihin ndo, ta cuví sacuvi maa ndo cha vaha chihin ñu ñáá ri quívi cuñí ndo. Soco yuhu ñima tyicuan ri cua cunyai chihin ndo. <sup>8</sup>Ñaha síhi ihya sacuvi ña yoso cuhva cha cuví chi ña. Choso ña ndutya vixi chahán coño ñuhi, cha ni cumañi ca cucuvi ta quíhvi chichi ñuhu. <sup>9</sup>Cha ndicha catyí chi ndo, vatyí tandíhi ri nicahnu ñuhu ñayívi nu cahan ñu tuhun Nyoo, cunacatyí tucu ñu tuhun cha sacuvi ñaha ihya, tacuhva nicohon íni ñáyívi tuhun ña —catyí ra Jesús.

**Nu nacuhvā cuenda ra Judas chi ra  
Jesús chi ra xaan íni chi ra**

(Mt. 26.14-16; Lc. 22.3-6)

<sup>10</sup>Yahā cuan ta ra Judas Iscariote, noo ra chichi cha uchi uvi tahan ra cachicá noo chihin ra Jesús, chahān ra chindatuhun ra chihin ra cacuví nuu chi tata sutu, vatyí casandaa ra noo tyiño ta nacuhva cuenda ra chi ra Jesús chichi ndaha ra. <sup>11</sup>Cuhva cha cachiñi ra ihya, cusii xaan cacuñí ra, ta catyí ra vatyí cuhva ra xuhun chi ra. Tyicuan ta quichahā nducu ra Judas cuhva nacuhva cuenda ra chi ra Jesús.

**Nu cuxiñi ra Jesús chihin ra cachicá  
noo chihin ra**

(Mt. 26.17-29; Lc. 22.7-23; Jn.  
13.21-30; 1 Co. 11.23-26)

<sup>12</sup>Cuví chi quívi quichaha vico cha chachí ñu pan cha ñahri

yuchan iya yihí. Yucuan quívi cha vico pascua tuhvá ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candaca tuhun ra chi ra, ta cacatyí ra:

—¿Nya maa maa cuñún cha sanduvaha ndi cha cuxiñun cha vico ihya?

<sup>13</sup>Tyicuan ta tachí ra chi uvi tahan ra ta catyí ra chi ra:

—Cuahan ndo chichi ñuu, ta yucuan cunañihi ndo chi noo ra cha nyisó noo quívi ndutya. Cuahan ndo chata ra. <sup>14</sup>Ta nu quíhvi ra, catyí ndo chi ra cuví chitoho vehe yucuan tyehé caa: “Ra Sacuaha cuñí ra coto ra nya nyaá cuarto nu cusanducahnu ra vico chihin ra cachicá noo chihin ra”, catyí ndo chi ra. <sup>15</sup>Ta maa ra cusañaha ra noo cuarto cahnu nu piso sucun chi ndo. Cha yahā nduvii, ta yucuan cusanduvaha ndo cha cuxiñi yo —catyí ra Jesús chi ra.

<sup>16</sup>Cuahan coyo ra. Ta chaā coyo ra chichi ñuu. Canañihí ra tari cuhva catyí ra Jesús chi ra, ta casanduvahā ra cha cuxiñi ra cha vico pascua cuan. <sup>17</sup>Ta cha cuaa cuan chaā ra Jesús chihin ndi uchi uvi ra chicá noo chihin ra. <sup>18</sup>Ta cuhva cha canyicú ra nu mesa cachachí ra, ra Jesús catyí ra:

—Cha ndicha catyí chi ndo vatyí noo nyoho cha chachí ndo chihin cunaxico tuhun ndo chii.

<sup>19</sup>Tyicuan ta canducuihya íni ra ta quichaha candaca tuhun tahan tahan ri ra chi ra, ta cacatyí ra:

—¿Atu yuhu?

<sup>20</sup>Ta nacahān ra Jesús ta catyí ra: —Noo ra chichi cha uchi uvi ndo. Ra cha satyii pan iin ri nu coho

chihin, ican ra cuan cuví. <sup>21</sup>Vatyi yuhu Rayii cha quichi nya gloria cucuvi chii tari cuhva catyí nu tutu tuhun Nyoo. Soco indahvi ra ndahvi ra naxicó tuhun chii! Vaha taxin ca cha cuenda ra, tyehe ta ña cacu ra —catyí ra Jesús.

<sup>22</sup>Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo. Ta tahvi ra ta chaha ra chi tandihi ca ra, ta catyí ra:

—Quehen ndo. Ican ihya cuví coñe —catyí ra chi ra.

<sup>23</sup>Yaha cuan ta quehen ra vaso vinu. Ta cha yaha cha nacuhva ra tyahvi nyoo chi Nyoo, chaha ra chi ra. Ta tandihi ra cachihí ra cha ñohó chichi vaso cuan. <sup>24</sup>Ta catyí ra chi ra:

—Vinu cha yihí chichi vasu ihya tari niñi cuví. Ta chihin niñi tyihí tahan Nyoo tuhun chaa chihin ndo vatyi cucati cha cuenda cha vaha chi cuaha ñáyivi. <sup>25</sup>Cha ndicha catyí chi ndo vatyi ma coho que vinu nyacua nya quivi nachai nu nyacá ñaha Nyoo ta cohi vinu chaa —catyí ra Jesús chi ra.

**Nu catyí ra Jesús tyi cucatyí ra Pedro tyi ña ñohó nuu ra chi ra**

(Mt. 26.30-35; Lc. 22.31-34; Jn. 13.36-38)

<sup>26</sup>Cha yaha cha cachita ra yaa, ta caquita ra cuahan coyo ra nya yucu yutun Olivo. <sup>27</sup>Tyicuan ta catyí ra chi tandihi ra:

—Tandihí nyoho cusandoo notuhun maa ndo chii vityin cha cuaa. Vatyi catyí chi nu tutu tuhun Nyoo tyehe caa: “Cucahni chi ra sahá cumi mbee, ta mbee cacacono ti ityi cuan ityi ihya”, catyí chi.

<sup>28</sup>Soco cha yaha cha nandote, xihna que cuhun ityi Galilea ican saha nyoho —catyí ra Jesús chi ra.

<sup>29</sup>Tyicuan ta quichaha catyí ra Pedro chi ra:

—Vasi tandihi ra sandoo ra chuun, soco yuhu ma sandoi chuun —catyí ra chi ra Jesús.

<sup>30</sup>Soco ra Jesús catyí ra chi ra:

—Cha ndicha catyí chuun, vatyi suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chii uñi chaha —catyí ra Jesús chi ra Pedro.

<sup>31</sup>Soco saniñi ra Pedro ta catyí ra:

—Vasi cúvi chuhun, soco ma tixehi cha ñohó nui chuun —catyí ra Pedro.

Ta tandihi ra cacatyí ra tyicuan caa.

**Nu chican tahvi ra Jesús nu cuví Getsemaní**

(Mt. 26.36-46; Lc. 22.39-46)

<sup>32</sup>Tyicuan ta cacha coyo ra noo nu nañi Getsemaní. Ta ra Jesús catyí ra chi ra cachicá noo chihin ra:

—Cunyicu ndo ihya ni ri cuhin cucacan tahvi —catyí ra Jesús.

<sup>33</sup>Ta quehen ra chi ra Pedro, ta ra Jacobo ta ra Juan cuahan chihin ra. Ta quichaha chica xaan iñi ra ta cutyoño cuñi ra. <sup>34</sup>Ta catyí ra chi ra:

—Tuví iñi añime noo tucuihya iñi, ta cuñi cahni chi chii. Ndo nyoho ihya, ta conyito ndo —catyí ra.

<sup>35</sup>Tyicuan ta cuahan ra chiin ca ityi nuu ca. Ta chicuini chiti ra nu ñuhú. Ta chican ra chi Nyoo tatu cuvi cha ma nyehe

ra tindoho cha cua cuvi chi ra  
cuhva cuan, catyí ra chicán tahvi  
ra.

<sup>36</sup>Ta nu chicán tahvi ra, ta catyí  
ra:

—Sutu Mañi yuhu, cha cuenda  
yoho ñahri cha ma cuvi chuun. Tu  
yoho ta cuñún na canyaha tindoho  
ihya chii. Soco ma cuvi tari cuhva  
cha cuñí mai, soco cuhva cha cuñí  
maun na cuvi —catyí ra Jesús  
chicán tahvi ra.

<sup>37</sup>Yahā cuan ta nachaā ra nu  
nyicú ra. Ta nyehe ra tyi caquixí ra.  
Ta catyí ra chi ra Pedro:

—Yoho Simón, ¿atu quixún?  
¿Atu ña cuvī conyiton ni noo  
hora? <sup>38</sup>Conyito ndo ta caçan  
tahvi ndo tacuhva cha ma  
sanacava ra ña vaha chi ndo nu  
cuatyí. Cha ndicha, cuñí añima  
ndo sacuvi ndo cha vaha, soco  
coño ñuhu ndo vita xaan cuñí chi  
—catyí ra Jesús chi ra.

<sup>39</sup>Tyicuan ta cuahan ra inga  
chaha. Ta chicān tahvi ra suri  
maa cha chicān ra cha xihna ri.  
<sup>40</sup>Tyicuan ta nachaā tucu ra inga  
chaha, nyehe ra tyi caquixí ra.  
Vatyí nicunyasi maa chiti nuu ra  
chihin cha cacuñí xaan ra cusu ra.  
Ta ña cachitō ra ñáá cha nacahan  
ra chihin ra Jesús. <sup>41</sup>Ta chahan ra  
cha cu uñi chaha, ta nachaā ra, ta  
catyí ra:

—Vityin ndicha cusu ndo, nyitatu  
ndo. Cha iyó vaha ri vityin, cha  
chaā cuhva cha cucuhva cuenda  
ra chi yuhu Rayii cha quichi nya  
gloria ndaha ra ca iyó cuatyí.

<sup>42</sup>Ndīcuita ndo, cōho ndo. Cha  
vachi ra naxicó tuhun chii —catyí  
ra Jesús chi ra.

### Nu catiín ra chi ra Jesús

(Mt. 26.47-56; Lc. 22.47-53; Jn. 18.2-11)

<sup>43</sup>Ni cahán ca ra Jesús ta chaā ri  
ra Judas, noo ra chichi cha uchi uvi  
tahan ra chicá noo chihin ra. Ta  
cuaha sındaro ta policía vachi coyo  
chihin ra canyisó ra mityi ta yutun.  
Vachi coyo ra cuenda ra cacuví  
nuu chi tata sutu, ta ra casacuaha  
cuenda ley vehe ñuhu, ta cuenda  
ra mandoñi. <sup>44</sup>Cha ni cumañi ca  
cachaa coyo ra, ra Judas, ra cha  
naxicó tuhun chi ra, chahā ra noo  
seña chi ra ta catyí ra:

—Ra cha tyayuhi, ican ra cuan  
cuví. Tīin vaha ndo chi ra na cuhun  
ra chihin ndo.

<sup>45</sup>Ta cuhva cha chaā ra tuhva ra  
nu nyaá ra Jesús ta catyí ra chi ra:  
—Maestro.

Ta tyayuhu ra xitīn ra. <sup>46</sup>Tyicuan  
ta catiín ra chi ra Jesús ta cuahan  
ra vehe caa.

<sup>47</sup>Soco noo ra cha nyaá yucuan  
tava ra mityi ra ta chahnya ra soho  
musu ra cuví nuu chi tata sutu.

<sup>48</sup>Tyicuan ta ra Jesús catyí ra chi ra  
cachaa coyo cuan:

—¿Atu vachi tiin ndo chii chihin  
mityi ta chihin yutun, tari cha  
vatyí cuví yuhu noo ra suhu? <sup>49</sup>Ndi  
quivi chinyaj chihin ndo sañahí  
chichi vehe ñuhu cahnu cuan. Ta  
ni noo chaha ña tiin ndo chii. Soco  
cuví chi tyehe caa vityin, tacuhva  
chino cava tari cuhva catyí nu tutu  
tuhun Nyoo —catyí ra Jesús chi ra.

<sup>50</sup>Tyicuan ta tandihi ra cachicá  
noo chihin ra, cachino ra ta casandoq  
noo tuhun maa ra chi ra Jesús.

<sup>51</sup>Soco noo ri ca ra tyivaa nyicón  
ra chi ra, ndichí ra noo sinduhu ta

catiin tucu ra chi ra. <sup>52</sup>Soco sandoo ra sinduhu cuan ta cuahan vavaha ra vityiaa vityi cañi ra.

**Nu cutuñi chi ra Jesús nuu ra cuví tyiño**

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup>Tyicuan ta cachinyaca ra chi ra Jesús nuu ra cuví nuu chi tata sutu, ta candu iin ri tandihi ra chihin ra cacuví mandoñi, ta ra casacuahá cuenda ley vehe ñuhu. <sup>54</sup>Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoo ra nyaá ra chihin policia sanasaá ra chi ra yatyin yunuhu.

<sup>55</sup>Ra cacuví nuu chi tata sutu, ta tandihi ra cuví tyiño canducu ra ñáá noo cuatyí tyaa ra siqui ra Jesús, tacuhva cuví cacahñi ra chi ra soco ña cañihí maa ra. <sup>56</sup>Vasi cuaha ñáyivi cahān ñu cuendu siqui ra, soco ña nacachí tahan tuhun cahān ñu. <sup>57</sup>Yihí ñu candicuitā ñu ta catyaq ri maa ñu cuendu siqui ra, ta cacatyí ñu:

<sup>58</sup>—Nyuhu chiñi ndi cha cahān ra vatyí cusatani ra vehe ñuhu cahnu cha savaha ñáyivi. Ta chichi cha uñi quivi cunacananyaa ra inga vehe ñuhu cha ñima ñáyivi savaha, na —catyí ñu.

<sup>59</sup>Soco ni tyicuan caa ña nacachi tahan cha catyí ñu. <sup>60</sup>Tyicuan ta ra cuví nuu chi tata sutu ndicuitā ra mahñu nu nyicú tandihi ra yucuan, ta quichaha ndaca tuhun ra chi ra Jesús, ta catyí ra:

—¿Atu ña nacahan maun? ¿Ñáá cha cuví ihya cha cacahān ra sicun? —catyí ra chi ra.

<sup>61</sup>Soco ra Jesús taxi ri nanyaá ra, ta ña nacahan maa ra. Ta ra cuví nuu chi tata sutu cuan ndaca tuhun ra chi ra inga chaha, ta catyí ra: —¿Atu yoho cuvún Cristo, Sehe Nyoo ra cha iyó cha vaha chi?

<sup>62</sup>Ra Jesús catyí ra chi ra: —Ican, yuhu cuví. Ta nyoho cunyehe ndo chi yuhu Rayii cha quichi nya gloria, cucunyai chiyo vaha Nyoo ra cha iyó tandihi tunyee iñi chi. Ta cunyehe ndo chii quivi quichi nu vico andivi —catyí ra chi ra.

<sup>63</sup>Tyicuan ta ra cuví nuu chi tata sutu cuan, chahnya ra sahma ra tari noo seña vatyí ña tahán iñi ra, ta catyí ra:

—¿Ñáá ca cha ndaa cuñi yo? <sup>64</sup>Nyoho cha chiñi ndo vatyí chicoo cuatyí ra nuu Nyoo chihin tuhun cahān ra. ¿Yoso caa cuñi nyoho? —catyí ra.

Ta tandihi ra cacatyí ra vatyí tahán chi cúvi ra.

<sup>65</sup>Tyicuan ta suhva ra quichaha tyicu sii ra chi ra. Ta chasi ra nuu ra, ta cañi ra chi ra chihin chiqui ra ta cacatyí ra chi ra:

—iNacoto yóo cha cañi chuun! —cacatyí ra chi ra.

Ta policia cacatu ra nuu ra.

**Nu catyí ra Pedro vatyí ña ñohó nuu ra chi ra Jesús**

(Mt. 26.69-75; Lc. 22.56-62; Jn. 18.15-18, 25-27)

<sup>66</sup>Ra Pedro nyaá ra ityi yuvi nuquehe. Tyicuan ta chaq noo ñaha sahá tyiño chihin ra cuví nuu chi tata sutu cuan. <sup>67</sup>Ta cuhva cha nanyehē ña chi ra Pedro vatyí sanasaá ra chi ra yunuhu cuan,

ndoo ña nyehé vavaha ña chi ra, ta catyí ña chi ra:

—Yoho ñandihí, chica noun chihin ra Jesús ra ñuu Nazaret cuan — catyí ña chi ra.

<sup>68</sup>Soco ra Pedro tixehe ra, ta catyí ra:

—Ña ñohó nui chi ra, ña chité ñáá tuhun cahún —catyí ra chi ña.

Tyicuan ta quitā ra ityi yuvehe. Tyicuan ta chacu noo loho.

<sup>69</sup>Tyicuan ta ñaha cha nyaá tyiño yoo cuan, nanyehé tucu ña chi ra inga chaha ta quichahā catyí ña chi ra canyicú yucuan:

—Noo ra tahan ra cuan cuví ra ihya —catyí ña.

<sup>70</sup>Soco tixehe ra inga chaha.

Ta yaha suhva ri ca cuhva ta ra canyicú yucuan cacatyí tucu ra inga chaha chi ra Pedro:

—Cha ndicha vatyí noo ra yucuan cuví yoho, vatyí ra Galilea cuvún, vatyí tari cahán ñu, cahún —catyí ra chi ra.

<sup>71</sup>Tyicuan ta iyo xaan tyanaha ra Pedro, ta catyí ra:

—iChitó vaha Nyoo tyí ña ñohó nui chi ra cha cahán nyoho tuhun! iNa cahñi Nyoo chii tatu ña ndicha cha cahín! —catyí ra.

<sup>72</sup>Ta caa cuhva ri cuan chacu ri loho cha cu uvi chaha. Tyicuan ta nichohon iñi ra Pedro tuhun cha cahān ra Jesús chihin ra: “Cha ni cumañi ca cuacu loho uvi chaha, yoho cucatyun vatyí ña ñohó nuun chi yuhu uñi tahan chaha.” Nichohon iñi ra Pedro ta quichaha chacu chaa ra.

#### Nu nanyaā ra Jesús nuu ra Pilato

(Mt. 27.1-2, 11-14; Lc. 23.1-5; Jn. 18.28-38)

**15** Cuhva cha cundichin candu iñ ri ra cacuví nuu chi

tata sutu chihin ra cacuví mandoñi ta chihin ra casacuahá cuenda ley vehe ñuhu ta tandihí ra cuví tyiño ñu Israel. Ta ra Jesús nuhñi ra, chinacuhva cuenda ra chi ra chi ra Pilato. <sup>2</sup>Ta ndaca tuhun ra Pilato chi ra, ta catyí ra:

—¿Atu rey cuenda ñu Israel cuví yoho?

Ta nacahān ra Jesús ta catyí ra: —Ican, yuhu cuvi. Ndicha cha cahún.

<sup>3</sup>Ta ra cacuví nuu chi tata sutu cuaha xaan cha catyaā ra siqui ra. <sup>4</sup>Tyicuan ta quichahā ndaca tuhun tucu ra Pilato inga chaha chi ra, ta catyí ra:

—¿Atu ña nacahan maun? Nyehe yoso cha cuaha cha tyaá ra sicun.

<sup>5</sup>Soco ra Jesús ña nacahān maa ra. Yucuan chaha ña chitó ra Pilato ñáá cha caca xiñi ra.

#### Nu cutuñi chi ra Jesús vatyí cucuvi ra

(Mt. 27.15-31; Lc. 23.13-25; Jn. 18.38—19.16)

<sup>6</sup>Ta vico cuan tuhvá ra Pilato saña ra chi noo ra ñohó vehe caa, noo ra cha cacān maa ñáyivi. <sup>7</sup>Ta ñohó noo ra nañi Barrabás vehe caa cuan, iin ri chihin inga ra cha cachahñi chi ñáyivi noo nu naquiqui ñáyivi siqui gobiernu. <sup>8</sup>Ta quichi coyo ñáyivi quichahā chican ñu chi ra Pilato na saña ra chi noo ra tari tuhvá maa ra. <sup>9</sup>Ta nacahān ra Pilato, ta catyí ra:

—¿Atu cuñi nyoho cha sañe chi Rey cuenda ñu Israel?

<sup>10</sup>Tyicuan caa catyí ra vatyí tuví iñi ra vatyí ra cacuví nuu chi tata sutu cuan tasi cuñi ra chi ra



Jesús tyi cuaha ñáyivi nyicón chi ra, yucuan chaha nacuhva cuenda ra chi ra. <sup>11</sup>Soco ra cacuví nuu chi tata sutu cuan catyiyuhū ra chi ñáyivi na catyí ñu na saña ra chi ra Barrabás. <sup>12</sup>Tyicuan ta ndacaḡ tuhun ra Pilato chi ñu, ta catyí ra:

—¿Ta ñáá cha cuñí ndo sacuvi chihin ra cha catyí nyoho Rey cuenda ñu Israel chi? —catyí ra chi ñu.

<sup>13</sup>Tyicuan ta nacanachaḡ ñu, ta catyí ñu:

—iNa cúvi ra nu cruzi! —catyí ñu, canachaá ñu.

<sup>14</sup>Ta catyí ra Pilato chi ñu:

—Soco ¿ñáá cha ña vaha sacuví ra? —catyí ra.

Soco canachaḡ ca ñu ta catyí ñu:

—iNa cúvi ra nu cruzi! —catyí ñu.

<sup>15</sup>Tyicuan ta vatyí cuñí ra Pilato cuvaha ra nuu ñu, sañaḡ ra chi ra Barrabás. Tyicuan ta tyihí ra tyiño na ndoho ra Jesús, ta cha yaha cuan chahḡ cuenda ra chi ra vatyí cúvi ra nu cruzi.

<sup>16</sup>Tyicuan ta chinyacḡ sindaro chi ra nuquehe vehe tyiño cuan. Ta casandu iñ ri ra tandihí sindaro.

<sup>17</sup>Ta casacuihnḡ ra noo sahma tyacu nyaa chi ra. Ta caquicuḡ ra noo corona chihin iñu. Ta catyihí ra xiñi ra. <sup>18</sup>Yahḡ cuan ta quichaha cacanaḡ chaa ra siqui ra chacú nyaa ra chi ra, ta catyí ra:

—iNocumi chuun, yoho Rey cuenda ñu Israel! —catyí ra.

<sup>19</sup>Ta cacañi ra xiñi ra chihin noo yutun, ta tyicú sii ra chi ra. Ta cachicuiñí chiti ra casaha ra tyi sacahnu ra chi ra. <sup>20</sup>Cha yahḡ cha chacuḡ nyaa ra chi ra tyicuan caa, tinyaḡ ra sahma nyaa cuan chi

ra, ta sandihviḡ noo ra sahma maa ra chi ra. Yahḡ cuan ta cuahan ra chihin ra vatyí cuatyaa ra chi ra nu cruzi.

### Nu cuacúvi ra Jesús nu cruzi

(Mt. 27.32-44; Lc. 23.26-43; Jn. 19.17-27)

<sup>21</sup>Yahá noo ra ñuu Cirene, nañí ra Simón. Sutū ra Alejandro ta ra Rufo cuví chi ra. Ni cua nachaa ra cha chahan ra nu chiqui. Ta cuhva cha cua yaha ra ityi cuan, casaniñí sindaro chi ra na cuiso ra cruzi ra Jesús.

<sup>22</sup>Ta cachinyacḡ ra chi ra Jesús noo nu nañí Gólgota. Ta cuñí chi catyí: Nu Cuví Yiquí Xiñi Ndiyí.

<sup>23</sup>Ta cachahaḡ ra vinu nasacḡ chihin noo tatan cha nañí mirra coho ra. Soco ra Jesús ña chihí ra. <sup>24</sup>Cha yahḡ catyaaḡ sindaro chi ra nu cruzi, cachahan ra sihva chihin sahma ra ta nya ra sahḡ ganaa caquehen ra sahma ra.

<sup>25</sup>Caa iin cha ñaha ri catyaaḡ ra chi ra nu cruzi. <sup>26</sup>Ta letra cha catyaaḡ ra xiñi cruzi cuan, catyí chi ñáá cuatyí ra. Ta catyí chi tyehe caa: “Ican ra ihya cuví Rey cuenda ñu ñuu Israel.”

<sup>27</sup>Ta chinanyaḡ ra uvi ca cruzi nu chitacaḡ ra uvi tahan ra suhu, noo ra chiyo vaha ra, ta inga ra chiyo satyin ra. <sup>28</sup>Ta tyicuan caa quitaḡ chi tari cuhva catyí nu tutu tuhun Nyoo tyehe caa: “Sahá ñu tuhun tyi cuví ra noo ra quiñi iyó.” <sup>29</sup>Ta ñu yahá coyo chacú nyaa ñu chi ra. Ta quisí xiñi ñu, ta catyí ñu chi ra:

—iJaan! iYoho cha catyūn tyi cusatanun vehe ñuhu cahnu, ta chichi cha uñi quivi cunacoñehun inga chaha! <sup>30</sup>iSḡacu maun chuun ta nḡo nu cruzi chiña! —catyí ñu.

<sup>31</sup>Ta tyicuan caa tucu ra cacuví nuu chi tata sutu ta ra casacuahá cuenda ley vehe ñuhu, cachacú nyaa ra chi ra, ta catyí ra chi tahan ra:

—iChi inga ñu sacacu ra, soco ña cuví sacacu ra chi maa ra! <sup>32</sup>Na noo ra nu cruzi vityin, na nyehe yo ta chino iñi yo tyi Cristo Rey cuenda ñu Israel cuví ra —catyí ra.

Ta nyacua nya ra tacaá inga cruzi inchiyo inchiyo xiin ra ta cacahán ra chi ra.

### Nu chihí ra Jesús

(Mt. 27.45-56; Lc. 23.44-49; Jn. 19.28-30)

<sup>33</sup>Cuhva cha cua cu hora, tandihi ñuhu ñayivi nduñaa, nyacua nya caa uñi cha cha iñi. <sup>34</sup>Ta suri kuhva cuan canachaa ra Jesús chihin tandihi fuerza ra, ta catyí ra:

—Eloi, Eloi, ¿lama sabactani? —ta cuñi chi catyí: Nyoo Suti, Nyoo Suti, ¿ñáá tuhun sandoq noo tuhun maun chii? —catyí ra.

<sup>35</sup>Suhva ra tayucu yucuan cachiñí ra ta catyí ra:

—iXihna! Caná chaa ra chi ra profeta Elías —catyí ra.

<sup>36</sup>Tyicuan ta chinq noo ra yucuan chiquehen ra noo tari caa xixan ta satyí ra chihin vinu iya. Ta tyaa ra noo nu yutun ta satuhva ra yuhu ra na coho ra, ta catyí ra:

—Cuqtu ndo. Na nyehe yo tatu quichi ra Elías sanoo ra chi ra —catyí ra cuan.

<sup>37</sup>Tyicuan ta ñihi xaan canachaa ra Jesús, ta chihí ra. <sup>38</sup>Ta sahma cha tacaá chichi vehe ñuhu cahnu ndata sava maa chi, nya siquí ta nyacua nya ityi yuvi. <sup>39</sup>Ta noo capitán cuenda sindaro Roma

nanyaá ra yatyin nuu ra Jesús cuan. Cha nyehe ra yoso caa cana chaa ra, ta yoso caa chihí ra, ta catyí ra:

—Cha ndicha ndicha cuii vatyí Sehe Nyoo cuví chi ra ihya —catyí ra.

<sup>40</sup>Ta nya sava ri tayucú tucu suhva ñusihí canyehé ñu. Ta mahñu ñu cuan nanyaá cu María ñaha Magdala, ta cu María sihi ra José ta ra Jacobo ra tyivaa ca. Ta nanyaá tucu cu Salomé. <sup>41</sup>Ican ñusihí ihya cachinyicon chi ra Jesús, ta tyinyéé ñu chi ra quivi chica noo ra ityi Galilea. Ta siin ri nyicú cuaha ca ñu cha chaa coyo chihin ra Jerusalén cuan.

### Nu chicuchí ñu chi ra Jesús

(Mt. 27.57-61; Lc. 23.50-56; Jn. 19.38-42)

<sup>42</sup>Cuví chi quivi cha sanduvaha ñu cha cachi ñu vatyí inga quivi tuhva ñu nyitatu. <sup>43</sup>Ta cha cuaa cuan chaa ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñi ra ta quihvi ra nu nyaá ra Pilato, ta chican ra coño ñuhu ra Jesús chi ra. <sup>44</sup>Iyo cuñi ra Pilato cha nacoto ra vatyí cha chihí ra Jesús. Ta cana ra chi capitán vatyí ndaca tuhun ra tatu cha yaha chihí ra. <sup>45</sup>Ta cha catyí capitán vatyí cha yaha chihí ra, ra Pilato chaha ra coño ñuhu ra chi ra José. <sup>46</sup>Tyicuan ta satá ra José noo sinduhu cha chinq chihin sahma finu cha nañi lino, ta sanoo ra coño ñuhu ra. Ta siquí noo ra chihin sinduhu cuan. Yaha cuan ta chityihí ra chi ra noo chichi ñaña cha cachatyá ra chichi noo yuu. Ta chasi ra yuhu ñaña cuan chihin noo yuu

cahnu. <sup>47</sup>Ta cu María ñaha Magdala cuan ta cu María sihi ra José, chaꝝ coyo ñu nyehe ñu nu tyihí ra chi ra.

### Nu nandotoꝝ ra Jesús

(Mt. 28.1-10; Lc. 24.1-12; Jn. 20.1-10)

**16** Yahꝝ quivi nyitatú ñu. Tyicuan ta cu María ñaha Magdala ta cu María sihi ra Jacobo, ta cu Salomé satꝝ ñu ndutya vixi chahán ta cuahan coyo ñu cua tyihi ñu coño ñuhu ra Jesús. <sup>2</sup>Ta timingu cuví, quivi quichaha vitya, ñaha cuii ri cuhva cha vachi cundichin cuhva cha ni cua cañꝝ ñanyii, chaꝝ coyo ñu nu ñaña. <sup>3</sup>Ta catyí ñu chi tahan ñu:

—¿Yóo cha cusacanyaha yuu yuhu ñaña cuan? —catyí ñu chi tahan ñu.

<sup>4</sup>Soco cuhva cha nanyehe ñu, yuu cahnu cha nyasi yuhu ñaña cuan cha cuachiyó chi nya sava. <sup>5</sup>Quihví coyo ñu chichi ñaña yucuan. Ta nanyehe ñu chi noo ángel tari caa noo ra tyivaa, nyaá ra chiyo vaha. Ta ñihnó ra sahma cañi ta cuichin. Ta canayuhví ñu. <sup>6</sup>Soco catyí ra chi ñu:

—Ma yuhvi ndo. Nyoho nanducú ndo chi ra Jesús ra ñuu Nazaret, ra cha chihí nu cruzi. Soco cha nandotoꝝ ra. Ña ñohó ca ra ihya. Nyehe ndo nu chacun ra chi ra. <sup>7</sup>Cuꝝhan ndo cua sacoto ndo chi ra Pedro ta chi inga ra cachicꝝ noo chihin ra. Catyí ndo chi ra vatyí na cuhun coyo ra ityi Galilea vatyí yucuan nyatú ra Jesús chi ra, tari cuhva catyí ra chi ra. Vatyí ra Jesús cha cuahan ra ityi nuu —tyicuan caa catyí ángel cuan chi ñu.

<sup>8</sup>Tyicuan ta cuahan coyo vavaha ñu, vatyí suri canihí ñu cha cuenda

cha yuhví ñu. Ta yori maa chihin cahán ñu tuhun cha cuenda cha yuhví ñu.

### Nu tuví ra Jesús nuu cu María ñaha Magdala

(Jn. 20.11-18)

<sup>9</sup>Cuví chi timingu quivi quichaha vitya cha nandotoꝝ ra Jesús. Yahꝝ cuan ta xihna ca nuu cu María ñaha Magdala tuví ra. Maa ña cuví ñaha cha tavꝝ ñehe ra ucha tahan tatyí ña vaha. <sup>10</sup>Ta chahan ña chisacoto ña chi ra cachicꝝ noo chihin ra, vatyí canyicú cuihya ra ta cachacú cha ra. <sup>11</sup>Soco cuhva cha cachiñi ra vatyí iyó ra Jesús ta vatyí nyehe ña chi ra, ña cachino iñi ra.

### Nu tuví ra Jesús nuu uvi tahan ra chicꝝ noo chihin ra

(Lc. 24.13-35)

<sup>12</sup>Cha yahꝝ cuan, ra Jesús tuví ra nuu uvi tahan ra cha cuahan coyo chica ityi ityi nu chiqui. Soco siin caa cuhva caá ra cananyehe ra chi ra. <sup>13</sup>Ta cuanuhu coyo ra ta sacoto ra chi tandihí ca ra. Soco suri ña cachino iñi ra cha cacahan ra cuan.

### Tuhun cha chahꝝ ra Jesús chi ra cha tyatyinoꝝ ra chi

(Mt. 28.16-20; Lc. 24.36-49; Jn. 20.19-23)

<sup>14</sup>Ta cuee ca ta tuví ra Jesús nuu ndi uchi iin ra cha cachicꝝ noo chihin ra, cha ni ri ca cha canyicú ra nu mesa. Ta cahan ra chi ra cha cuenda cha ña cachino iñi ra, ta cha cuenda cha candava añima ra vatyí ña cachino iñi ra tuhun cahan ñu nyehe tyi nandotoꝝ ra. <sup>15</sup>Ta catyí ra chi ra: —Cuꝝhan ndo nicacahnu ñuhu ñayiví, ta cahan ndo chihin

tandihi ñáyivi, ta catyi ndo chi ñu yoso caa sacacú Nyoo ańima ñu. <sup>16</sup>Ta ñu cha chinó ińi ta condutya ñu, cucacu ańima ñu. Soco ñu cha ña chinó ińi cundoo cuatyí ñu siqui ñu ta cunaa ñu. <sup>17</sup>Ta tandihi seńa ihya cusacuvi ñu cha chinó ińi chii: Chihin sivi cutava ñehe ñu tatyí ña vaha. Cucahan ñu inga sahan cha ña chitó ñu. <sup>18</sup>Cutiin ñu coo, ta tatu coho ñu cha yihí venenu, ma saha cuehe chi ñu. Ta siin ri cutyiso ñu ndaha ñu siqui ñu cuhví, ta cunduvaha ñu.

**Nu nandaq xica ra Jesús andivi**

*(Lc. 24.50-53)*

<sup>19</sup>Nu ndihi cahān Sutu Mańi yo Jesús chihin ra, ta nandaq xica ra andivi, ta chicunyaq ra chiyo vaha Nyoo. <sup>20</sup>Tyicuan ta ra cachica noo chihin ra quitā ra ta chahān coyo ra chicahān ra tuhun Nyoo yoso caa sacacú ra ańima yo tandihi ri ityi. Suri maa Sutu Mańi yo tyinyee chi ra vatyí chahā ra cha sacuvi ra cuaha milagru. Ta tyicuan caa nyehé ñáyivi tyi ndicha tuhun cacahān ra.